



✓ 8.1242







262.9

Pét

# **SYMBOLÆ**

**AD FIDEM ET STUDIA TYRANNI RUFINI  
PRESBYTERI AQVILEIENSIS ILLUSTRANDA,**

**E SCRIPTIS IPSIUS PETITÆ,**

**QVAS PRO GRADU LICENTIATI THEOLOGIE RITE  
IMPETRANDO,**

**RESPONDENTE**

**M. EYRIKSEN,**

ORNATISSIMO S. S. MINISTERII CANDIDATO,

*Lambertus*

**PUBLICO ERUDITORUM EXAMINI SUBJICIET**

**PÈTUR PÈTURSSON,**

PRÆPOSITUS TOPARCHIÆ SNÆFELLSNESENSIS ET HNAPPADALENSIS,  
PASTOR ECCLESIE STADASTADENSIS

---

**DIE XI MAII H. L. Q. S.**

---

**H A V N I Æ.**

**TYPIS EXCUDERAT FABRITIUS DE TENGNAGEL.**

Dissertationem hanc inauguralem dignam censet ordo  
Theologorum, quæ pro gradu Licentiati Theologiæ rite  
impetrando publicæ disquisitioni subjiçatur.

Havniæ d. xxviii April. MDCCCXL.

Dr. *H. N. Clausen*,  
h. a. Ord. Theol. Havn. Decan.



## CONSPECTUS ARGUMENTI.

---

Introductio § 1.

### SECTIO PRIMA

de præcipuis vitæ Rufini momentis, cum occupationibus ejus litterariis coherentibus § 2—4.

### SECTIO SECUNDA

de Origene, libris ejus περὶ Ἀρχῶν eorumque Rufini versione latinâ § 5—12.

### SECTIO TERTIA

de scriptis Rufini dogmaticis ejusque de singulis fidei catholicæ articulis professione § 13—20.

### SECTIO QUARTA

de Rufini polemicâ scribendi ratione cum Hieronymi collatâ, brevi addito certaminis inter eos conspectu historico § 30—35.

### SECTIO QUINTA

de Rufino interprete Sacræ Scripturæ, et historico § 36—42.

---



---

## INTRODUCTIO.

### § 1.

**O**mnes, qui ad examinandas res divinitus revelatas pio desiderio ducti feruntur, valde juvabit, non solum religionis nostræ fontes adire, e quibus solatium hauriant vitæque dirigendæ normam sufficientem eliciant, verum in id etiam diligentius inquirere, quomodo fontes in rivos dispersi vitam ecclesiæ christianam provocaverint idæque christianæ in ingeniorum diversitate diverso modo sese enucleaverint. At in fati religionis christianæ lustrandis, in censum præcipue veniunt antiqui ecclesiæ doctores, qui patrum nomine salutantur quorumque auctoritas & scripta ad hanc vel illam religionis formam constituendam plurimum valuerunt. His enim ignoratis, nisi historiæ ecclesiasticæ face singulas ætates lustremus, periculum est, ne in doctrinis biblicis et ecclesiasticis dignoscendis vacillemus, et aut utramque doctrinam confundamus, aut unam ab altera nimis divellamus. Namque, ut biblicæ doctrinæ, quæ omni temporum injuriæ adeo restiterunt, ut indolem genuinam hucusque servaverint, pro ideis, beneficio divino

revelatis, habendæ sunt, quæ cum desiderio religioso apprime conspirantes, variis licet involucris indutæ, ad pectus tamen humanum viam sibi semper muniunt animique vi spirituali commovent; sic etiam constat, alias doctrinas rationibus historicis efformatas esse, e quibus indoles biblica vix ac ne vix quidem agnosci queat. Qui igitur, relicto historiæ ecclesiasticæ campo, auctoritati ecclesiæ ducendum se committit, nec ad diversa, quæ religio christiana subiit, fata respicit, in devia feratur necesse est; e varia enim doctrinarum mole efformatam fidem comprehendit, comprehensam anxie tenet, pro biblica venditat, quæ si aliquo tandem modo corruerit, nil habet, quo amplius erigatur. Historia vero ecclesiastica, ut utilitatis plurimum habet, ita quoque est ad agnitionem pulcherrima et ad excitandas vires humanas efficacissima; tot enim nobis intuendos præbet egregios viros ad coelum totâ mente ac viribus tendentes integramque vitam veritati examinandæ et rebus divinis scrutandis consecrantes, quorum conatus considerantes nos in admirationem suæ imitationem quasi sublimes rapiunt; — sed multorum quoque exempla nobis ob oculos sistit evitanda, qui ab internâ doctrinæ indole aberrantes de externis ejus formis muniendis et auctoritate ecclesiæ stabiliendâ unice solliciti, in aliter his de rebus sentientes quocunque modo haud raro sævierunt, coloribusque nigerrimis depictorum memoriam posteritati tradiderunt. Hi quippe non semper optimè de ecclesiâ meriti sunt, qui pro præsentis ejus statu acerrimè puguârunt, sed multo magis, qui illum ad biblicam idealemque indolem revocare ac humaniorem res divinas considerandi modum promovere conati sunt. Cum

igitur notitia patrum ecclesiasticorum theologiæ hand parum lucis affundat, operæ pretium esse putaverim in singulorum vitas et scripta diligenter inspicere, nec eos omnino negligendos, aut prætermittendos esse, qui ad inferiorem ordinem pertinere credantur, siquidem haud raro idem in his ac in ceteris veritatis examinandæ studium, idem doctrinæ amor, eadem humanitas, nec interdum nisi solâ doctrinæ laude, aut nomine orthodoxiæ ecclesiasticæ inter se differunt. His rationibus adductus, Tyranni Rufini presbyteri Aquileiensis, amicitia odioque Hieronymi æque noti, opera perlegere coepi, et inter legendum, quæ memoriâ maximè digna mihi videbantur, schedulæ commisi, e quibus in ordinem redactis et cum scriptis aliorum patrum ecclesiasticorum, imprimis Origenis, Hieronymi atque Augustini collatis, dissertatio hæcce qualiscunque constat. Sed in argumento proposito ita versatus sum, ut ea potissimum tractaverim, quæ studia Rufini theologica relationemque ejus ad sui ævi theologiam maxime illustrare viderentur, nec alia fere vitæ illius momenta tetigerim, quam educationem, studia, perigrinationes ac vitam monasticam, ut quæ eruditionis præsidia cum instituto meo cohærent. Cetera, quæ ad itinera illius et chronologiam rerum gestarum definiendam pertinerent, prætereunda putavi; præsertim cum Vallarsius, cujus editionem operum Rufini, Veronæ 1745 in fol., sequutus sum, historica vitæ Rufini momenta, libris duobus comprehensa, in unam quasi massam, crisi adhibitâ congesserit.

---

## Sectio Prima.

De præcipuis vitæ Rufini momentiis cum occupationibus ejus  
litterariis cohærentibus.

### § 2—4.

#### § 5.

Natus est Tyrannius Rufinus Concordiæ, quod erat oppidum Italiæ<sup>1)</sup>; quo vero anno natus sit memoriæ nusquam proditum reperitur; non tamen diu post concilium Nicænum anno 325 habitum, in lucem editum esse, e scriptis Hieronymi probari posse videtur<sup>2)</sup>; nec quo anno

1) Rufinum Aquileiæ natum esse, multi perperam asseruere; patriam enim eum non habuisse Aquileiam disertè docet Hieronymus Apolog. 2 Lib. 1. contra Rufin. num. 2. idcirco, inqviens, patriâ dcrelictâ Aquileiæ habitat; et in Apol. 2 in oppidulo natum esse dicit. ipsum Concordiæ natum e collatis inter se duobus Hieronymi locis patet. Exstat quippo Hieronymi epistola ad Paulum Concordiæ senem, quæ senem illum Paulum patriâ Concordiensem evincit; cujus rursus mentionem facit in epistola 5 ad Florentium Monachum Aquileiensem, Hierosolymis tunc morantem, sibi scripsisse dicens, quendam à patriâ supradicti fratris Rufini Paulum senem. itaqvo eadem videtur senis illius et Rufini patria fuisse, nempe Concordia, quod oppidum deinde Attila rex Hunorum solo æqvâsse dicitur cfr. Vallars. de vitâ Ruf. p. 3 et sqq.

2) cfr. Hieron. Apol. 2 (quam circa annum 400 scriptam esse Rufini Apolog. Lib. 1. num 36 ostendit), ubi Rufi-

mortuus sit, dubiis omnibus exemptum est, etsi plerique in annum 410 obitum ejus referant. De parentibus primaque Rufini infantia nil fere constat; sed mox ut adolevit, ex oppido Concordiæ, cum ab urbe Aqvileiâ, totius tunc Venetiæ primariâ civitate, haud procul distaret, Aqvileiam se contulit, monasticæ vivendi regulæ nomen daturus, ibique in monasterio patrum doctrinâ pietateque imbutus, à Valeriano urbis episcopo sacro lavacro ablatus est circa annum 370<sup>3)</sup>; annoque insequente, monachorum orientalium famâ commotus, de itinere Hierosolymas suscipiendo cogitavit et unacum Melaniâ, romanarum mulierum nobilissimâ, in orientem trajecit. Nec tamen recta Hierosolymas petiit, sed prius in Ægyptum profectus, ineunte anno 372 Alexandriam adplicuit, adhuc superstite Athanasio urbis episcopo, quo eodem anno defuncto, persecutionibus, partim sub Tatiano, partim sub Palladio, qvî illi in præfecturâ Ægypti subinde successit, in catholicos ortis interfuit<sup>4)</sup>,

---

num vocat senem et canum et in initio Libr. 3. appellat eum vetustissimum monachorum, quod de eo, nisi tunc certè sexagenarius fuisset, dicere non potuisset. Hinc patet, quam vero absimilis sit sententia Blondelli de Primatu pag 681 Rufini ortum illigantis anno 345, qvî fuit à concilio Nicæno visesimus; verum 325 nondum natum Rufinum testatur Natalis Alexander seet. 4 dissert 13. conclus. 2.; e quibus colligitur Rufinum intra ann. 325 et 345 natum esse; accuratius vero constitui nequit.

3) cfr. Apol. Lib. I. num. 4.

4) Rufini hist. eccles. Lib. 2. cap. 4. Apolog ad Anastas. num. 2.

variasque regiones peragrarè coactus, contra Arii dogmata, non solum carceribus, ut ipse testatur, sed exiliis quoque dimicavit<sup>5)</sup>; qui motus ubi deferbueret, ad literas colendas illustresque viros audiendos Alexandriam rediit compluresque præclaros doctores habuit<sup>6)</sup>.

### § 3.

Sexennio in scholis Ægyptiorum transacto, Rufinus, ut se totum vitæ monasticæ consecraret, anno, ut videtur, 378<sup>7)</sup> Hierosolymas tandem venit, ubi in monte Oliveti cellulas inhabitavit, quas, licet suas, non à se solo, verum etiam ab aliis monachis assiduo frequentatas ipse affirmat<sup>8)</sup>. Neque ideo tamen Hierosolymis ita substitit, quia ad invisendos aliarum etiam regionum eximios viros excurreret; nam Edessæ et Carrarum provinciæ Oshrenæ in Mesopo-

<sup>5)</sup> loco proximè citato.

<sup>6)</sup> Apol. Lib. 2. num. 12. enumerat: Didymum, Serapion, Menitem, quos dicit naturâ, moribus ac eruditione germanos; prætera complures eremi magistros, ut: Macarium Antonii discipulum alterumque Macarium et Isidorum et Pambam, quos omnes frequentius attentiusque audiebat.

<sup>7)</sup> Vallars. De vitâ Rufini Lib. 1. cap. 2. num. 7. statuit Rufinum anno 377 Hierosolymas venisse; quod cum adventu ejus in Ægyptum anno 372 et sex annis ibi transactis conciliari nequit; itaque in annum sequentem adventus ejus in urbem sanctam trahendus est.

<sup>8)</sup> Apolog. Lib. 2. num. 8.



tamiâ urbes hunc in finem lustravit; qvâ occasione Alexandriam iterum profectus esse videtur<sup>9)</sup>; at mox Hierosolymas reversus, complures ibi annos in litteris colendis, vita monasticâ exercendâ ac in omnis generis hominibus pio illuc desiderio ductis liberaliter excipiendis transegit<sup>10)</sup> et cum viris illustrissimis familiaritatem iniiit<sup>11)</sup>.

#### § 4.

Sed inter amicos Rufini primum locum tenet Hieronymus (Stridonensis); nam inde ab adolescentiâ inter eos intima amicitia coaluerat, mutuâ studiorum societate aucta<sup>12)</sup>; in eodem qvippe, qvo Rufinus, monasterio Aquileiensi Hieronymus aliquantisper commoratus fuerat, donec improviso rerum eventu illinc in Orientem discedere cogeretur<sup>13)</sup>. Nec tamen longinquitate tam arctum inter eos

---

9) l. e. num. 12.

10) Pallad. cap. 128.

11) Inter summos viros, qvibus Rufinus Hierosolymis familiariter usus est, imprimis eminet Bacurius rex Iberiâ, vir scriptorum antiquorum testimonio celeberrimus cfr. Zosimi. hist. eccles. lib. 4 sub finem et Socrat. lib. 7. cap. 10.

12) cfr. Hieron. epist. 3.

13) Tempus, qvo Hieronymus Aquileiâ commoratus sit, accuratè omnino definiri non potest. Engelstoft in Dissertatione suâ de Hieronymo § 3 dicit eum circa annum 372 tempus aliquod Aquileiâ transegisse; sed cum ante hunc annum ibi fuisse, inde apparet, qvod priore anno Rufinus ad iter Hierosolymas suseipiendum se accinxerat, et tunc Hieronymus Aquileiam jamdudum reliquerat; nam subito turbine quodam, ut ait, abreptus in orientem dis-

amoris vinculum dissui posse videbatur, cum Hieronymus, mox ut itineris Rufini in orientem suscipiendi nuncium à Paulo Concordiensi accepit, Hierosolymas ad Florentium Aquiliciensem literas Rufino reddendas, nunc vero deperditas, misit <sup>14)</sup> et in Ægypto degenti plures deinde epistolas eundam animorum concentum spirantes scripsit. Similiter Rufinus, quando Hierosolymas pervenit, veterem cum amico familiaritatem renovavit; quæ inter utrumque arcta necessitudo, virtutibus studiisque innutrita, eo usque crevit, ut Augustino teste, tam caras familiaresque personas cunctis pene ecclesiis notissimo amicitiae vinculo copulatas, christiani omnes admirarentur <sup>15)</sup>. — Tanto magis dolendum est, hanc inter eos amicitiam in odium postea vehementissimum abiisse, ita ut unus alterum conviciis persequi non dubitarent; cujus rei causa ut luculentius appareat, cum ad dogmatica et polemica deinceps Rufini scripta commemoranda aditum nobis muniat, res theologicas spectandi modus altius repetendus et cum ingenio illius ævi conferendus est.

---

cesserat, (Hieron. epist. 3) indeque Rufino Hierosolymas venturo epistolam scripsit.

<sup>14)</sup> cfr. Hieron. epist. 4. ubi Rufinum ait individua germanitatis caritate sibi connexum, et subinde dicit: noli nos ejus (scilicet Rufini) æstimare virtutibus, in illo conspicies expressa sanctitatis vestigia.

<sup>15)</sup> August. Epist. ad Hieron. 73. c. 3.

---

## Sectio Secunda.

De Origene, libris ejus *Περὶ Ἀρχῶν* eorumque Rufini versione latinā.

## § 5—12.

## § 5.

Medio fere seculo secundo, schola, ut satis notum est, Alexandriae christianis catechetis et catechumenis ulterius efformandis ad exemplum scholarum philosophicarum, quæ in Græcia floruerant, condita est; quæ enim apologetæ, cum telis hæreticorum undique adorti intelligere cæpissent opus esse armis scientificis ad propugnandam religionis christianæ veritatem, quasi invitati addidicerant, hæc schola amore litterarum scientiarumque ducta in se recepta consummavit, philosophiam, imprimis platoniam, in religionem christianam applicando, et cum involucra historica cum notionibus universalioribus conciliare studeret, liberaliorem idearum christianarum enucleationem peperit. Hinc prodiit Origenes, maximum ætatis suæ decus, qui scholæ catecheticæ antistes, discipulos per vastissimum græcarum litterarum campum ad spiritualem rerum divinarum intelligentiam speculativamque religionis christianæ considerationem perducere studuit, Ita discipulorum multitudine, quos efformabat, pariter ac scriptis suis, quæ eandem animi libertatem spirant studiumque ideas christianas ad unitatem philosophicam redigendi, non in cœvos solos, verum quoque in posteros et secula subsequētia haud mediocrem vim exeruit; quæ, dum nec ecclesia, nec dogmata christiana immotam externamque

formam nacta essent, se liberius movere potuit. Initio quippe religio christiana, ut interna sensus ac voluntatis harmonia, pectus humanum occupaverat, at superatis seculo quarto curis externis, cum persecutionibus a civitate non amplius obnoxia esset, tranquillitate meditandique spatio oblatis, tota fere ecclesiæ potestas ad dogmata christiana accuratius efformanda et stabilienda sese convertit, metuens, ne, quæ tanto labore acquisita essent, nisi certo et perpetuo habitu armarentur, e manibus suis fortasse exciderent; quo factum est, ut fundatus jam externus ecclesiæ status, divergentes doctrinarum spectandarum rationes subsistere et in unitatem abire juberet; verum hæc externa harmoniæ efficiendæ conamina, quæ adeo pro mandatis a civitate datis habenda erant, non nisi externam unitatem provocare valuerunt, ita ut de ipsâ doctrinarum christianarum indole non tam quæreretur, quam de modo, quo explicarentur. Quam ob rem vires illæ spirituales, quæ e vitâ Origenis in ecclesiam emanaverant, ultra prodiere sine obstaculis non potuerunt; — quanto namque magis fides historico - ecclesiastica notionem orthodoxiæ unice constituebat, vitæque austeritas sanctior habebatur, tanto rigidius crescens indies cleri imperium in philosophicam humanioremque dogmatum christianorum enucleationem odium exercere cæpit.

## § 6.

Inter clarissimos Origenis præcones fuere Rufinus atque Hieronymus, quorum hic 14 in Jeremiam totidemque in Ezechielem Origenis homilias latine redditas edidit tantæque admiratione Origenem prosequebatur, ut secundi

ab Apostolis magistri titulo illum ornare haud dubitaret<sup>16)</sup>; At quo magis vitæ asceticæ se consecravit orthodoxiæque ecclesiasticæ adhærere coepit, eo iniquior Origenis arbiter evasit, ejusque admiratione in fastidium abeunte, omnes tandem Origenis fautores infestissimo tanquam hæreticos odio persequutus est. Hinc disrupta atque adeo in atrocissimum odium conversa, intima, quæ inde à juventute inter Rufinum ac Hieronymum intercesserat amicitia, cujus primam occasionem dedit Aterbius quidam, qui unacum aliis in Rufinum, ut sectatorem Origenis clamare coepit et Hieronymum utpote Rufini amicum et olim Origenis fautorem eodem crimine involvit; ex quo Hieronymus se Origenis adversarium publicè profiteri coepit. Panno antea exorta erat discordia inter Epiphanium, Salaminia in Cypro episcopum, Origeni quam maximè infectum (de quo vide infra § 17) et Johannem episcopum Hierosolymitanum ejusdem fautorem, in quo dissidio Rufinus Johanni, Hieronymus Epiphanio, adhæsit; sic Rufinus et Hieronymus ex opposito adversi magis magisque alienabantur; nec tamen inimicitia inter eos prius palam erupit, quam anno 401<sup>17)</sup>.

---

<sup>16)</sup> cfr. Hieron. Præfat. ad Vincent. Engelst. de Hieron. § 10.

<sup>17)</sup> Rectius Engelstoft § 18 disruptum palam inter eos amicitiae vinculum anno 401, dicit, quam Vallarsius, qui in vitâ Rufini cap. 3. hoc in annum 394 refert, tum enim a diversâ modo parte stabant, nec ulla mutue inimicitiae signa ediderunt; immo, quatuor annis antea, extincto schismate Hierosolymitano: anno 397, dextris junctis amicitiae foedus instaurarunt cfr. Hieron. Apol. Lib. 3. p. 462.

## § 7.

Eo jam pervenimus, unde Rufino et apud Hieronymum et multos alios summa invidia et reprehensio conflatae sunt; quod scilicet ex oriente anno 398 in occidentem reversus et in monasterio Pineti in agro romano degens, rogante Macario quodam, quatuor *Περὶ Ἀρχῶν* Origenis libros, etsi non uno tenore, in linguam latinam transtulit, in quorum praefatione auctoritatem praetendit Hieronymi, qui Origenem tantopere laudasset, ut scripta ejus legendi desiderium cuivis commovisset, sequē ait rem ab Hieronymo inceptam atque probatam persequi, etsi non aequis eloquentiae viribus tanti viri dicta ornare posset. Quam Rufini de Hieronymo laudem fictam et obliquam simul esse, quasi ejus nominis fama Rufinus propriam haeresin tegere vellet, amici Pammachius et Oceanus ad Hieronymum detulerunt; quo nuntio in furorem actus, redditus ad eos literis, Origenis praefatiunculam fusius refutavit, auctoremque vehementer iacrepans, se ab Origenis dogmatibus omnino alienum esse declaravit et novam Origenis librorum *Περὶ Ἀρχῶν* versionem à se elaboratam iis misit; verum hoc unicum mansuetudinis exemplum dedit, quod nomini Rufini ita pepercit, ut ne uno quidem verbo illum tanquam auctorem alterius versionis nominaret; quare amici non acquiescentes, sinistram Rufino ab Hieronymo testimonium datum in vulgus disperserunt, nomen Rufini palam eo magis exosum reddituri, quo Hieronymi auctoritas illum gravius premere videbatur. Rufinus vero, quae contra se scriberentur, silentio non praetereunda ratus, apologiam duobus libris constantem, anno 401 scripsit, cujus gravissimis capitibus per amicos acceptis, Hierony-

mus duobus apologiæ libris in Rufinum invecus, epistolam ei, nunc deperditam extorsit, ac subinde tertium apologiæ librum contra Rufinum conscripsit, ad quem hic nil omnino respondit.

### § 8.

Origenes igitur et nominatim libri eius *Περὶ Ἀρχῶν* discordiæ inter Rufinum atque Hieronymum causa primaria fuerunt, quippe qui doctrinas fidei ecclesiasticæ adversantes continere crederentur; et certè ex omnibus Origenis scriptis hoc notissimum fuit, nam in illo singula religionis christianæ principia definiendo persequi conatus est; in eo enim de Deo, de patre videlicet, de filio spirituque sancto, de angelis, animâ, mundo, sacra scripturâ aliisque disputat. Quid Deum attinet, statuit illum esse incomprehensibilem et inæstimabilem<sup>18)</sup> invisibilem et incorporeum<sup>19)</sup> in cuius naturâ nulla sit divisio<sup>20)</sup>; creatas vero res omnes vicissitudinibus obnoxias<sup>21)</sup> boni matique capaces<sup>22)</sup>; mali vero causam in entium ratione præditorum imperfectione quærendam, et ex abusu libertatis, quæ essentiam rationalium creaturarum quasi constituat, et peccatum oriri et diversum, in quo consistent,

---

18) Monendum est, me sequi edit. Oper. Origen. auctore Carolo Deharue Paris. 1733 in fol.

cfr. *περὶ Ἀρχῶν* Lib. 1. cap. 1. num. 5. p. 50.

19) — — Lib. 2. cap. 4. num. 3. pag. 86.

20) — — Lib. 1. cap. 2. n. 5. p. 55.

21) — — Lib. 2. c. 9. n. 2. p. 97.

22) — — Lib. 1. c. 8. n. 4. p. 76.

perfectionis gradum<sup>23</sup>); indeque præexistentiam animarum elicit; nam, quo ei objectioni occurrat, rationes externas, quæ unumquemque ad conscientiam sui emergentem circumdant, plus minus conferre ad liberam virium spiritualium explicationem, et ad earum diversitatem, hominis nullâ culpâ provocatam, diversitatem conditionis humanæ referendam esse; statuit, Deum ante corpora numerum quendam animarum æquilibrium creasse<sup>24</sup>) quæ pro peccatorum mensurâ et qualitate variis corporibus, cæcæ carceribus, humilitati locorum congruis inclusæ sint<sup>25</sup>); prius vero quam ad inferiora loca descenderent, et de invisibilibus ad visibilia commigrarent, ruentesque ad terram crassis corporibus indigerent, in diviniore habitaculo apud superos commoratas esse<sup>26</sup>); primum vero omnium spirituum, qui inde ab initio amore perfectissimo Deo fuerit conjunctissimus, merueritque à Deo nunquam amplius divelli, animam esse Jesu Christi<sup>27</sup>); ceteros omnes, qui naturæ divinæ participes non sint, mutabiles esse<sup>28</sup>), cum conditionibus mutabilibus obnoxii libertatē fruantur, ideoque impeccabiles non reddi; hinc poenarum naturam eliciendam; esse nimirum medicinales e bonitate Dei pariter

---

23) De arbitrii libertate passim disputat; cfr. Præfat. ad Libr. 1. num. 5. p. 48. lib. 1. cap. 9. n. 6. et 7. p. 99 et libr. 3. cap. 1. p. 108.

24) Lib. 2. cap. 9. n. 6. p. 99. Lib. 1. c. 7. n. 3. p. 72.

25) Lib. 3. cap. 5. n. 4. p. 150.

26) Loco citato.

27) Lib. 4. n. 31. p. 191.

28) Lib. 2. c. 9. p. 97 etc.



ac iustitiâ, corrigendis, qui luant, inflictas; nec sermonem esse posse de illarum æternitate<sup>29)</sup> cum vel ipse diabolus, etsi post longam seculorum seriem resipiscens ad Deum aliquando sit reversurus<sup>30)</sup>; nam post hunc alios fore mundos, quemadmodum plures antea fuerint<sup>31)</sup>; e notione quippe mundi notionem temporis pendere, nec sine mundo tempus unquam fore, ne Deus ociari videatur; post resurrectionem omnium corpus fore æreum, non e carne constans, quæ poenæ loco entibus adhæreat<sup>32)</sup>.

### § 9.

Hæc e multis non nisi pauca ideo delibata sunt, ut appareat, in quibusnam imprimis fidei articulis hi libri à norma ecclesiæ credendorum divergentes, crimen hæreseos auctori et interpreti contraxerint. Nec tamen Origenes has doctrinas pro absolutâ veritate venditavit, sed modo tanquam opiulones problematicas iudicio lectoris submitendas proposuit; doctrinæ enim ecclesiæ catholicæ primum generatim expositæ sententias suas annectit<sup>33)</sup> coque ipso discrimen inter *Πισίν* et *γνωσίν* indicans discipulos per illam ad hanc ducere voluit, elementum religionis historicum et philosophicum conciliaturus. Propter hanc operis ideam fundamentalem, quam bene de ecclesiâ meritis sit Origenes, iis modo persvaderi potest, quibus

<sup>29)</sup> Lib. 2. cap. 5. n. 3. p. 88.

<sup>30)</sup> Lib. 1. c. 6. p. 69. et 71 item: cap. 8. p. 75.

<sup>31)</sup> Lib. 2. c. 3. p. 79 et Lib. 3. c. 5. p. 149.

<sup>32)</sup> Lib. 3. c. 5. p. 149 et 150.

<sup>33)</sup> cfr. Præfat. Origen. Libri 1 *Περί Α'ρχών* pag. 47 et 48.

curæ cordique est, desiderium religiosum cum indole religionis christianæ conciliare, ideasque menti humanæ divinitus innatas in revelatione Dei historicâ confirmatas reperire; nam ex hoc Origenis opere sincerum veritatis examinandæ studium elucet, et si disputatio fidei confirmandæ ubique non inserviat, id saltem efficit, ut oppositio inter fidem historico-ecclesiasticam et philosophicam rerum divinarum considerationem luculentius indicaretur, cuius discriminis exponendi conamina eos, qui fidem ecclesiasticam cum biblicâ confusam mordaciter tenebant, necessario offenderunt.

#### § 10.

Cum igitur quæritur, quo jure Rufinus libris Origenis *Περὶ Ἀρχῶν* in latinum sermonem vertendis invidiam et odium Hieronymi aliorumque sibi conflaverit, distingvendum est inter opus susceptum et operis absolvendi modum. — Quod illud attinet, facile apparet, talem laborem adeo non esse vituperandum, ut nesciam an ulli illius ævi suscepto plus debeat theologia, si modo versionem sacri codicis Hieronymianam exceperis; indicatâ enim oppositione inter fidem ecclesiasticam et philosophicam fidei explanationem, excitatoque simul fidei stabiliendæ desiderio, vires doctorum ad theologiam uberius excolendam provocabantur, ita ut haud vero absimile sit, nisi veritatis examinandæ libertas inde nata, externis ecclesiæ armis oppressa fuisset, theologiam illius ævi alium omnino colorem ad philosophiam magis vergentem, nacturam fuisse. Sed ævi iugum magis convenit, unitatem fidei ab ecclesiæ potestate constitui, quam ad eam per disquisitionem rerum

credendarum emergere. Eo igitur nomine Rufino certè gratiæ referendæ sunt, quod ejus potissimum curâ et studio, Origenis plerisque lucubrationibus deperditis græcè scriptis, illæ saltem, quas latio reddidit, quasi paucae e magno naufragio tabulæ superstites ad nos venerunt.

### § 11.

Ceterum aliter res se habet, si de eo quæritur, num interpretis munere ritè fungendo sententiisque ac verbis auctoris fideliter transferendis laboris suscepti laudem servaverit; nam hoc omnino negandum est.

Quamvis enim de fide Rufini interpretis judicatio haud mediocris inde difficultas oriatur, quod non nisi fragmenta græci textus habeamus ideoque de variis gravissimi momenti locis nil certi statuere valeamus, e versione tamen Rufini, partim cum effatis Origenis, quibus temporis injuria pepercit, partim cum interpretatione Hieronymi in epistolâ ad Avitum 94 et alibi collatâ, evinci poterit, Rufinum, ea librorum *Περὶ Ἀρχῶν* loca, quæ ab ecclesiastica fide nimis abhorreere viderentur, ad sancitam ab ecclesiâ credendorum normam plus justo accommodasse; cujus rei exempla quædam adferamus:

*Περὶ Ἀρχῶν* Lib. 1. cap. 2. n. 12. p. 59. Οὕτω τοίνυν ἡγῆμαι καὶ ἐπὶ τῇ σωτηρίας καλῶς ἂν λεχθήσεθαι ὅτι εἰκὼν ἀγαθοτήτος τῆ θεῆ ἐστίν, ἀλλ' ἐκ αὐτὸ ἀγαθόν, καὶ ταχα ὅς ἀγαθός, ἀλλ' ἐκ ὡς ἀπλῶς ἀγαθός. καὶ ὥσπερ εἰκὼν ἐστὶ τῇ θεῇ τῇ ἀοράτῃ, καὶ κατὰ τῆτο θεός, ἀλλ' ἐπερὶ ἧ λέγει αὐτός ὁ χριστός. ἵνα γινώσκωσί σε τον μόνον ἀληθινὸν θεον. ὣτως εἰκὼν ἀγαδοτητος, ἀλλ' ἐκ ὡς ὁ Πατήρ ἀπαρἀλλάττως ἀγαθος. Pro his verbis alia omnino

Rufinus substituit et sensum eo usque emollire conatus est, ut eandem filio, quam patri bonitatem adscripsisse Origenem faciat; nec tamen jure merito Hieronymus in epistolâ ad Avitum nuper commemoratâ, Origenem hic filium non bonum, sed auram quandam et imaginem bonitatis asseruisse confendit; hoc enim utique observandum est, Origenem in dignitate Christo detrahendâ non versari, sed multo magis eam cum doctrinâ suâ de Deo fundamentalî conciliantem hoc unice inculcare: Deum patrem esse omnis perfectionis primum et ultimum principium, et ad hoc principium perfectissimam filii bonitatem esse referendam.

Lib. 1. cap. 3. n. 5. p. 62. ὁ μὲν θεὸς καὶ πατὴρ συνέχων τὰ πάντα φθάνει εἰς ἑκάστον τῶν ὄντων μεταδιδούς ἑκάστῳ ἀπο τῆ ἰδίας το εἶναι. ὧν γὰρ εἰσιν. ἐλάττων δὲ πρὸς τὸν πατῆρα ὁ ὕψος φθάνων ἐπὶ μόνῃ τα λογικῇ, δευτερὸς γὰρ ἐστὶ τῆ πατρὸς. ἔτι δὲ ἦττων τὸ πνεῦμα τὸ ἅγιον ἐπὶ μόνῃς τῆς ἁγίας δικνέμενον ὥς τε κατὰ τῆτο μειδῶν ἢ δύνάμεις τῆ πατρὸς παρὰ τὸν ὕψος καὶ τὸ πνεῦμα τὸ ἅγιον. πλείων δὲ ἢ τῆ ὕψος παρὰ τὸ πνεῦμα τὸ ἅγιον etc. Hæc Rufinus mutando addendoque ad sensum catholicum revocavit; at Hieronymus Origeni verba textus græci crimini vertit, quasi filium et spiritum sanctum patre minores esse voluerit, et recte, si ad litteras verba resecantur; verum e contextu loci apparere videtur, Origenem non tam de discrimine inter potestatem illorum faciendo cogitasse, quam de diverso illo modo, quo natura divina manifestetur; et tum Deus pater prima ultimaque omnium causa, ubique ac in omnibus sese revelat, filius in historiam generis humani descendit, et spiritus sanctus non

nisi in piâ mente operatur, unde non potentia, sed revelationis respectu obsectorum diversitas gignitur. Lib. 1. c. 5. n. 5. pag. 68. ubi textus græcus deperditus est; versiones autem Rufini et Hieronymi aliquantum inter se discrepant; quarum Rufini sic audit: Et per hoc consequens est in nobis esse atque in nostris motibus, ut vel beati, vel sancti simus, vel per desidiam et negligentiam à beatitudine in malitiam et perditionem vergamus in tantum, ut nimius profectus (ut ita dicam) malitiæ, si quis in tantum sui neglexerit, usque ad eum statum deveniat, ut ea, quæ dicitur, contraria virtus efficiatur. Hieronymi sic: Quibus moti disputationibus, arbitramur suâ sponte alios esse in numero sanctorum et ministerio Dei, alios ob culpam propriam de sanctimoniâ corruentes, in tantam negligentiam corruisse, ut etiam in contrarias fortitudines verterentur. Quamvis utraque versio similem sensum reddat, Rufinus tamen variis vocabulis addendis (ex. c. ut ita dicam — quæ dicitur) sensum mitigare studuisse videtur, quasi partim problematicam, partim vulgo receptam sententiam Origenes inculcare voluisset; eatenus autem alteri versionem ejus præferendam existimo, quod præsens tempus retinuit; auctoris enim sine dubio consilium fuit de naturâ humanâ ita disputare, ut ostenderet, nec ullum vel substantialiter vel naturaliter immaculatum, nec substantialiter esse pollutum; ideoque, si diaboli exemplum in præcedentibus attulerit, non tam de certis quibusdam exemplis, quam de naturâ humanâ in universum cogitavit.

Lib. 1. c. 6. n. 2. p. 69 et 70 Rufinus verba Origenis de conditione vitæ futuræ diversâ ac vicissitudinibus

obnoxia emollire conatus est, sensumque non sine longo circuitu reddidit.

Lib. 1. c. 7. n. 4. p. 73. verbotenus non transtulit.

Lib. 1. c. 8. n. 4. p. 76 ἡ ψυχὴ ἀποθρόεσσα τῷ καλῷ, καὶ τῇ κακίᾳ προσκλίναμένη καὶ ἐπὶ πλεῖον ἐν ταύτῃ γινομένη, εἰ μὴ ὑποσχεφοί, ὑπὸ τῆς ἀνοίας ἀποκτινῆται, καὶ ὑπὸ τῆς πονηρίας ἀποθριβῆται. καὶ μετ' ὀλίγα· καὶ αἰρεῖται πρὸς τὸ ἀλογωθῆναι, καὶ τον ἔνυδρον, ἔν' ἕτως εἶπω, βίον· καὶ τάχα κατ' ἀξίαν τῆς ἐπὶ πλεῖον πτώσεως τῆς κακίας ἐνδύεται σώματα ἑδεῖ (?) τοιῦδε ζώου ἀλόγου.

Hæc omnia Rufinus tantopere pervertit, ut Origenem eadem improbantem induxerit; e contrario Hieronymus Origenem hanc μετεμψυχωσιν tradidisse in epistolâ ad Avitum contendit. Attamen, si μετεμψυχώσις platonica principiis doctrinæ Origenianæ de præexistentiâ animarum admodum vicinasit, cum utraqve transmigrationem animarum coelitus delapsarum admittat, eam tamen Origenes neque probavit (cfr. contr. Cels. Lib. 4. n. 16. p. 512), nec ei ab Epiphanio usquam crimini versa est, qui non minore in dogmata Origenis, quam in μετεμψυχώσιν odio ferebatur<sup>34</sup>). Si denique ad locum nostrum respicimus, ex eo

---

<sup>34</sup>) cfr. (Oper. Epiphaniî edit. a Petavio Aurelianensi Coloniae, anno 1682) Epiphani. Advers. Hæres. Lib. 1. n. 2. p. 13. ubi in Stoicos his verbis perorat: καὶ περὶ τῶ τῶν ψυχῶν μεταγγραμῶ πολλή τις ἡ φαυλότης τῆς παραπεποιημένης σα διανοίας ἐθελοσοφε, καὶ γινώσκων ἀνθρώποις επαγγελλομενε. εἰ γὰρ μέρος θεῶ ὑπάρχει καὶ ἀθάνατος, σώματα δὲ οἰκτρα ἢ μόνον ἐν ποίμῃ θηρῶν τε καὶ ἐρπενῶν καὶ κνωδάλων δυσγενῶν τῇ πλάσει αὐτῆς συνάπτεται, τῇ ἀπο θεῶ κατὰ σε τὴν ἡσιν κεκτημένη, καὶ τε ἂν γένοιτο τότε μοχθηρότερον;

hæc doctrina necessario non sequitur; apparet enim e verbis: *ὅν ἕτως ἔπω*, cetera comparativè esse dicta, auctoremque in eo versari, ut coloribus vividis mentem ad vitia quæcunque proclivem describat, quæ ad brutorum vitam sordibus diffluentem descendere non recuset.

Lib. 2. c. 1. n. 1. p. 77. pro concinnâ textus græci brevitate, superfluum verborum copiam substituit.

L. 2. c. 3. n. 2. p. 80. Versiones Rufini et Hieronymi inter se differunt, Rufini: Si enim aliquis potest vivere sine corpore, possunt et omnia esse sine corpore; omnia enim ad unum finem tendere superior tractatus edocuit. Si autem omnia possunt carere corporibus, sine dubio non erit substantia corporalis, cujus usus nullus existet. Hieronymi: Si omnia, ut ipse disputationis ordo compellit, sine corpore vixerint, consumetur corporalis universa natura et redigetur in nihilum, quæ aliquando facta est de nihilo, eritque tempus, quo usus ejus iterum necessarius sit. Utra versio hic præferenda sit, in medio relinqvam, utraqve enim cum principiis doctrinæ Origenianæ apprimè conspirat; secundum illam quippe versionem loqvutus est de illo temporis momento, quo omnia ad naturam spiritualem tantumque perfectionis fastigium evecta sunt, ut Deus in omnibus omnia operetur; secundum hanc, de tempore hanc omnium consummationem præcedente, quando creaturæ ratione præditæ eousque nondum pervenerunt, ut necessitate novi corporis creandi sublatâ, mutationis expertes a peccando prorsus destiterint.

Lib. 2. c. 6. n. 4. p. 90. accurate non transtulit.

Lib. 2. c. 8. n. 3. p. 95 et 96. Hieronymus sensum

et verba textus græci Rufino accuratius et nitidius exprestit.

L. 2. c. 9. n. 1. p. 97. Quæ Origenes hic de finitâ Dei potentiâ disputavit, Rufinus in explicando declinavit, et hæc verba omnino præteriit: *ἐὰν γὰρ ἡ ἀπειρος ἡ θεῖα δύναμις ἀράκη αὐτὴν μηδὲ ἑαυτὴν νοεῖν*; et pro his: *πεποίηκε τούτοις ὧν ἐδύνατο περιδράσασθαι, καὶ ἔχειν αὐτὰ ἐπὶ χειρὸς*, voluntatem Dei ut creandi normam substituit. — Hæc vero ab Origene, non tam ad circumscribendam potentiam divinam dicta sunt, quam quo ostenderetur, certis intelligentiæ legibus esse adscripta, ita ut in Deo voluntas et potentia eadem habendæ sint.

Lib. 3. c. 6. n. 3. p. 153. ubi notissimum Origenis dogma de beatarum animarum lapsu et peccatis interpretatione suâ in alios transfert, quin etiam, quod adscribentem aliis Origenem inducit, id refutantem ipsum exhibet infra num. 6. his verbis; in quo statu (ᾧ: beatitudinis) etiam permanere semper et immutabiliter creatoris voluntate est credendum. Præterea quam quod hujus loci Rufiniana versio Hieronymianæ in eo omnino repugnat, quod hæc verba ipsi Origeni tribuit, et sensum luculentiores reddit, aliis etiam locis contradicit, ubi Origenes omnes creaturas mutabiles et vicissitudinibus obnoxias esse contendit (efr. lib. 1. c. 9. p. 97).

Lic. 3. c. 6. n. 9. p. 155. ubi versto Rufini ita audit: tunc ergo consequenter etiam natura corporea illum summum et eui addi jam nihil possit, recipiet statum; At Hieronymi sic: Et erit Deus omnia in omnibus, ut universa natura corporea redigatur in eam substantiam, quæ



omnibus melior est, in divinam scilicet, quā nulla est melior. — Denique omnia in omnibus ita fieri, ut in Divinam naturam corpora tandem reciperentur, à doctrina ecclesiæ de carnis hujus resurrectione, nimis abhorrere Rufino certè visum est; ideoque ambiguitatem quandam in interpretandis auctoris verbis servavit. Dubia etiam contra fidem versionis Hieronymi hoc loco moveri possent, postrema enim verba: in divinam scilicet, quā nulla est melior, non interpretationem, sed commentarium in præcedentia continere videntur, cum omnino superflua sint, nec nisi sensum priorum verborum repetant. Utcunque res se habet, Origenis hæc certè fuit sententia: rem eo tandem venturam, ut in omnibus Deus operaretur et vel in corporibus sese manifestaret, quum natura eorum post resurrectionem spiritualis eo magis redderetur, quo alacrius creaturæ rationales ad perfectiorem statum eniterentur.

Lib. 4. n. 19 et 29 p. 181 et 182 Rufinus textum græcum reliquit, alia omittens aliaque mutans. Similiter num. 23. p. 185. ubi Origenes diversos gradus sortis infelicium in alterâ vitâ diversaque habitacula commemorat; quæ omnia Rufinus mitigare conatus est, et à receptâ inter sedem beatorum ac infelicium distinctione incipiens ad cetera proferenda caute pergit.

Lib. 4. n. 35. p. 194. interpretatio Hieronymi sensum Origenis accuratius, quam Rufiniana exprimere videtur.

Varii præterea loci sunt, in quibus, textu græco perperdito, versiones Rufini et Hieronymi inter se differunt; quarum utri primæ deferendæ sint difficile erit pro certo definire. ex. c. Lib. 3. c. 1. n. 21. p. 136 et 137. cap. 3. n. 5. p. 144. cap. 5. n. 3 et 4. p. 149 et 150.

Restat, ut unum locum adferamus, quo fides Rufini in dubium vix vocari debet, etsi versio ejus Hieronymianæ repugnet, 3: Lib. 1. c. 2. n. 8 p. 56. versio Rufini: imago ergo est (3: Christus) invisibilis Dei patris, quantum ad ipsum quidem patrem veritas, quantum autem ad nos, quibus revelat patrem, imago est, per quam cognoscimus Patrem, quem nemo alius novit, nisi filius et cui voluerit filius revelare etc. Hieronymus autem in epistolâ ad Avitum contendit Origenem docere, quod sine dubio ad locum nostrum respicit: filium, qui sit imago invisibilis patris, comparatum patri non esse veritatem; apud nos autem, qui Dei omnipotentis non possimus recipere veritatem, imaginariam veritatem videri, ut majestas et magnitudo majoris quodam modo circumscripta sentiatur in filio: Denique patrem esse lumen incomprehensibile; Christum collatione patris, splendorem esse perparvum, qui apud nos pro imbecillitate nostrâ magnus esse videatur. — Verum hæc Hieronymi effata in libris Origenis, qui exstant, quantum eoque scio, nullibi reperiuntur, aliisque locis apertè repugnant, ubi Origenes plenam et perfectam veritatem (*αυτοαληθειαν*) in Christo fuisse dicit. cfr. cont. Cels. Lib. 6. n. 47. p. 669. Id certe Origenes affirmare voluit, patrem quidem esse omnis veritatis fontem atque principium: Christum nihilo secius veritatem esse posse, cum omnia ei à patre concessa sint ejusque imaginem moralem referat, quam in supremo loco positam intellectualis necessario sequatur.

## § 12.

Ex his, quæ allata sunt, Rufinum in vertendis libris *Περὶ Ἀρχῶν* justos limites transiisse patebit, quod etiam ipse quodam modo confessus, regulam, quam in explicandis fidei articulis secutus sit sui purgandi causa proposuit<sup>35</sup>); dicit quippe quædam in libris *Περὶ Ἀρχῶν* ita catholicè scripta, ut ecclesia prædicaret, quædam autem his contraria; cum de unâ eademque re dicatur, hæc secundum illam semper regulam proferenda sibi esse visa, quam ipse catholicæ regulæ expositione Origenes protulisset, et ea, quæ à semet ipso invenirentur esse contraria vel ab aliis inserta<sup>36</sup>), se abjccisse, aut certe, ut nihil ædificationis in fide habentia præterisset. — Voluit igitur ex analogiâ locorum cum fide catholicâ consentientium, cetera explicari; verum hoc non esse interpretis, qui sensum et verba uniuscujusque loci diligenter exprimere debeat, quis non videt? ideoque ab Hieronymo haud immerito male audit, ut qui ex hæretico Origenem catholicum reddere studuisset<sup>37</sup>). Nec tamen hoc ita intelligendum esse, ac si omnia Origenis effata auribus orthodoxis Rufinus accomodaverit, cum e libris ipsis apparet (cfr. supra

---

35) Ruf. Apolog. Lib. 1. n. 12. Blondell. in Defens. Fid. Nicæn. Sect. 2. c. 9. dicit constare Rufinum in vertendis Origenis libris, multa de suo addidisse, sed quotiescunque eâ libertate usus fuerit, de eo lectorem suum, prout hominem probum et veri amantem decebat, ipsum expressè monuisse. Hoc vero Rufinum non fecisse, e locis supra allatis apparet.

36) Rufin. scripsit librum de adulteratione librorum Origenis.

37) Hieron. Epist. 84.

§ 8), tum quoque inde, quod, si id fecisset, nec in crimen hærescos incidisset, nec Hieronymus eum propter novam istam Latinisque inauditam doctrinam sugillasset; denique, quod ipse satius putavit, confessionem suam fidei catholicæ congruam præmittere<sup>38)</sup>, ne, ut ipsius verbis utar, calumniantibus locus daretur, cum confessionis editæ vox ab omni suspitione contrarii dogmatis ipsum tutum fecisset atque munitum. Credidit enim, discrimine inter se ut interpretem et auctorem facto, suspicionem omnem hærescos à se posse amoveri, non observans, cum auctoris ad fidem ecclesiasticam redigendi sententiasque ejus orthodoxas reddendi munus suscepisset, fore, ut, si quæ his invenirentur contraria, eorum culpa sibi adscriberetur. — Tantum vero abest, ut sui excusandi ergo Origenis causam desernerit debitasve illi landes detraxerit, ut eruditionem ejus et ingenium summis ubique laudibus efferat, illiusque à vituperiis vindicandi causa nil intentatum relinquat; quemadmodum enim huic in finem Apologiam Pamphili pro Origene e græco in latinum sermonem transtulit<sup>39)</sup> sic etiam ipse contendit, Origenis libros in quam

---

<sup>38)</sup> cfr. Apolog. Lib. I. n. 13. 14. 36. et Præfat. ad Libr. *περὶ Ἀρχῶν*, item: Apol. Lib. 2. n. 31 et sqq.

<sup>39)</sup> Hieronymo teste Lib. I. apol. adv. Ruf. p. 357 hæc pro Origene Apologia e sex libris olim constabat; at Rufinus libri modo unius versionem confecit, ceterique jam perditii sunt. Hanc porro Apologiam Hieronymus l. c. Pamphilo abjudicatam Evsebio Cesaræensi episcopo tribuit; sed Evsebiū et Pamphilum conjunctis viribus in eā condendā laborāsse, apparet ex Evseb. Hist. eccles. L. 6. c. 33. c. vers. Ruf. c. 24.

plurimis esse corruptos<sup>40)</sup>; et quod libros *Περὶ Ἀρχῶν* attinet, argumenti difficultate consiliiqve sinceritate auctorem defendit; agere nimirum de rebus, in quibus philosophi omni sua ætate consumptâ nihil invenire potuerint. Quæ tamen effata ad ungvem non resecanda sunt, siquidem constat, quosdam patres ecclesiasticos et nominatim Origenem aliqua in philosophis, dogmatibus christianis respondentia, invenisse sibi visos esse. Duos quippe Platonis locos, 3; epistolas 6 et 7., Origenes cont. Cels. Lib. 6. n. 9. p. 636 de Christo explicat. Rufinus autem hoc sibi voluit, esse argumentum istorum librorum tam arduum atqve difficile, ut haud mediocrem laborem exigat, nec opus ideo statim esse rejiciendum aut condemnandum, si quædam à fide ecclesiæ aliena continere videretur; et ita rectè monuit, argumentum librorum ad forum fidei ecclesiasticæ proximè non pertinere, nec ex hac pretium eorum unicè ponderandum esse, cum auctor non solum historico, sed etiam speculativo fundamento opus suum superstruxerit. Verum, quæ Origenis excusandi ergo de argumenti explanandi difficultatibus attulit, alii vitio auctori verterunt, cum in ea se præceps curiosius ingessisset, quæ captum humanum superarent; horum acerrimus Epiphanius Origenem vocat: *ἐρευνήτην τῶν ἀνερευνήτων καὶ ἐκβίβασιν τῶν ἐπαυλίων*<sup>41)</sup>.

Consilium vero auctoris magnopere laudandum Rufinus asseruit, cum id pro viribus egerit, ut creatoris fidem et creaturarum rationem ad pietatem converteret<sup>42)</sup>;

40) Apolog. Lib. 1. num. 15.

41) Epiphanius. Advers. Hæres. Lib. 2. Tom. 1. p. 531.

42) Apolog. Lib. 1. n. 15.

seque ideo bene meritum, cum proficere ad scientiam rerum volentibus materiam præbuisset et ita ignotum plerisque philosophiæ religiosæ campum veritatis examinandæ studiosis aperuisset; sic autem suam eum Origenianâ causam quasi inscius confundit; si enim laudis Origenis particeps fieri voluit, necesse est, ejusdem culpæ utrumque fieri socium. Cum igitur argumentum librorum tantâ difficultate laboraret et consilium auctoris tam sincere atque honestum fuisset, si in verbo fortasse aliquando erraverit, excusandum Origenem, animo benigno corrigendum ac emendandum esse monuit, si quidem nos omnes, sacrâ scripturâ teste, in multis offendamus; nec illi denique vitio vertendum esse, quod, ut ipsi ejus libri, sic etiam versio sua ab aliis corrupta sit; ejus rei probandæ causa locum adferens, quando de invisibilitate Dei contra Valentinianos et Audropomorphitas Origenes egerat<sup>43)</sup>, hæc verba schedulis suis falso addita esse queritur<sup>44)</sup>: quia sicut filius patrem non videt, ita nec Spiritus sanctus videt filium; nequaquam enim sermonem fuisse de comparatione patris aut filii, sed de ipsa deitatis natura, num visibilitatis vocabulum in eam quadrare posset. Ejus modi vero adulterationis nullum hodie exstat vestigium, attamen Rufini interpretis hoc loco fidem vagam esse, suspicari licet: primum enim versio ejus anxietatem quandam in sensu exprimendo arguere videtur<sup>45)</sup>; deinde quoque ipse

---

43) Origen: περί Ἀρχῶν Lib. 1. c. 1. n. 8. p. 53.

44) Apolog. Lib. 1. n. 19 et 20.

45) Versio Rufini sic audit: Quod si requiras à me, quid etiam de ipso unigenito sentiam, si ne ipsi quidem visi-

fatetur, in græco aliqua incautus fortasse posita se interpretando declinasse, aut ad sensum catholicum revocasse<sup>46)</sup>; tum Hieronymus Origenem docuisse contendit<sup>47)</sup>: quæ admodum incongruum sit dicere, quod possit filius videre patrem, ita inconueniens esse opinari, quod spiritus sanctus possit videre filium; denique Epiphanius ex Origenis placitis unum hoc esse dicit<sup>48)</sup>: *ὅτι ὁ υἱὸς ὁ μονογενὴς ὁρᾷν τὸν πατέρα ἢ δύνатаι, ἀλλ' ἔτι τὸ πνεῦμα τὸν υἱὸν δύνатаι θεάσασθαι*. quæ verba, ut quæ eum additamento versionis Rufinianæ apprimè conspirent, ostendunt, Rufinum aut falso de adulteratione questum esse, aut Epiphanium e certo aliquo loco ea non desumsisse, sed e principiis doctrinæ Origenis elicuisse.

His fere continentur argumenta, quibus Rufinus Origenis, ut librorum auctoris, causam adversus Hieronymum dicere conatus est; de his vero, quibus se ipsum, cum Hieronymo collatum, defendit, infra agemus, quando ad polemicam ejus scribendi rationem perventum fuerit. Ex iis, quæ hac de re allata sunt, tanta liberalitas humanitasque elueet, ut non mirum sit, si alios non diversitate fidei, sed perversitate animi ad incusandum moveri crediderit<sup>49)</sup>.

---

f

bilem dicam naturam Dei, *ἥ* naturaliter invisibilis est, ne tibi statim vel impium videatur esse vel absurdum.

<sup>46)</sup> Apol. l. c.

<sup>47)</sup> Epist. 38 ad Pammachium.

<sup>48)</sup> Epiphanius. adv. Hæres. Lib. 2. Tom. 1. p. 527. cfr. ejusd. Epist. ad Johan. Episc. Hieros. et Ancorat. p. 66.

<sup>49)</sup> Apolog. Lib. 1. n. 7.

---

## Sectio Tertia.

de scriptis Rufini dogmaticis ejusque de singulis fidei catholicae articulis professione.

## § 13—29.

## § 13.

/s Cum igitur Rufini studium Origenem ad fidem ecclesiasticam revocandi, de orthodoxyâ ejus testari videatur, at ex alterâ parte susceptum Origenis patrocinium ejusque per occidentem promulgandi conatus, sententiis Origenis aliquatenus addictum fuisse arguant, præsertim cum omnia Origenis effata catholica non reddiderit; ea se jam nobis quæstio offert, quænam vera ipsius Rufini fuerit his de rebus persuasio; utrum sincero animo fidem ecclesiasticam amplexus fuerit, an metu interdum adactus, ne ceu hæreseos reus damnaretur et e consortio christiano-  
rum excluderetur. Verum, quo hæc quæstio aliquatenus solvi possit, necesse est, in diversa Rufini effata huc pertinentia diligentius inquiramus, et ex iis inter se collatis, quantum fieri potest, ad persuasionem ipsius concludentes, in quibusnam fidem catholicam amplexus sit, et quasnam cum Origene sententias communes habuerit, ostendamus. Ceterum ante omnia hoc monendum puto, fidem Rufini ex eâ regulâ, quam ipse sequendam proposuit<sup>50)</sup>, ponderandam esse: credendum esse Deum patrem unici filii sui Domini nostri, non discutiendum; nil enim putavit agi aut stare posse, nisi vis credendi præcesserit; nec ulli intel-

---

<sup>50)</sup> Comment. in Symb. Apostol. num. 4.



ligentiae aditum patescere, nisi se credere antea professus sit. itaque credendum ut intelligeretur. fidem quippe, aut dispositionem ad credendum, omnis religionis esse fundamentum; disquisitiones vero, sive historicæ, sive philosophicæ sint, explicandæ ac stabiliendæ fidei inservire. Hanc de fidei naturâ sententiam cum aliis patribus, nominatim Origene<sup>51)</sup> et Augustino<sup>52)</sup> communem habuit, quorum hic fidem gradum ad intelligentiam esse statuit, neminemque inveniendū Deo fieri idoneum, nisi prius crediderit, quod sit postea cogniturus. His quoque rationibus adductum Rufinum Originis dogmata quam maximè promulgantem, at mox iterum ad fidem ecclesiasticam auxiliè confugientem repræsentamus; ubi scilicet de sententiis Originis cum fide ecclesiasticâ conciliandis desperare cæpit, satius putavit, fundamento historico, quod divinam adeo habebat auctoritatem, quam speculativo, à totâ fere ecclesiâ suspecto, inuiti salutemque suam committere.

#### § 14.

Sparsos per libros sacros haberi, qui in unam deinde massam mittendi sint, christianæ fidei articulos constat. Quemadmodum autem in his nullus est liber, qui compendium aut systema fidei christianæ nobis offerat, ita nec e patribus veteris ecclesiæ quisquam est (et ne ipse quidem Origenes aut Lactantius), quem jure merito huc trahere possimus; quamvis enim hæc vel illa dogmata patres sparsim excoluerint, nemo tamen perfectum theo-

<sup>51)</sup> Origen. in Matth. Tom. 16. opp. Vol. 2. p. 728.

<sup>52)</sup> Aug. de lib. arbitrio Lib. 1. cap. 2. et Lib. 2. c. 3.

logiæ systema condidit, cum eam instituendi rationem secuti sint, quam tempora opinionesque adversariorum præcipuè requirebant. Nec Rufinus hac in re aliter versatus est; postquam enim suspectos Origenis *Περὶ Ἀρχῶν* libros per occidentem promulgandi laborem in se suscepit, in orthodoxyiâ suâ vindicandâ occupatus, eas modo doctrinas tetigit, quæ notionem orthodoxyiæ constituere crederentur; nec eas tamen philosophando tractavit, sed in fide suâ exponendâ obiterque perstringendâ acquievit. Præcipuum ejus huc pertinens opus, habendus est commentarius, quem scripsit in symbolum apostolicum<sup>53)</sup> cujus singulos articulos datâ operâ enucleare conatus est; hæc Symboli explicatio, cum à scriptoribus quoque ecclesiasticis laudata sit<sup>54)</sup>, inspicienda nobis et cum aliis Rufini de fide suâ effatis conferenda est.

### § 15.

Quo errores, quibus ab Hieronymo notabatur, à se amoliretur, Rufinus ad symbolum sæpius provocat, quod Aquileiæ sacrâ aquâ ablutus accepit reddiditque<sup>55)</sup>; et

---

53) Fuisse, qui hunc Commentarium Rufino adjudicatum, nunc Cypriano, nunc Hieronymo tribuerint, constat; sed de Rufino illius auctore vix quempiam nostro tempore dubitaturum credo.

54) Geunadius de Scriptor. ecclesiast. cap. 17 pag. 93. edit. Jenæ 1703. Rufinum auctorem his verbis laudat: proprio autem labore, immo gratiâ Dei et dono exposuit idem Rufinus Symbolum, ut in ejus comparatione alii nec exposuisse credantur.

55) Apolog. Lib. 1. num. 4. 5. Apolog. ad Anastas. n. 4. vel

singularem illius formulam à romano et orientali aliquantum differentem posteritati servavit, eandemque in symbolo exponendo sequutus est. Quamvis autem nullum horum symbolorum integrum recitaverit, singulas tamen eorum partes tam sedulo interpretando persecutus est, tantaque ἀκριβεια, quæ in quovis omissa, addita, vel inter se differentia reperiantur, commemoravit, ut in unum levi negotio colligi possint. Discrimen inter hæc tria a Rufino recitata symbola hoc est.

Romanum.

Credo in Deum patrem omnipotentem.

Et in Christum Jesum, unicum filium ejus, Dominum nostrum, qui natus est de Spiritu sancto ex Mariâ virgine, crucifixus sub Pontio Pilato et sepultus, tertiâ die resurrexit à mortuis, ascendit in cælos, sedet ad dexteram patris, inde venturus est judicare vivos et mortuos. Et in Spiritum sanctum, sanctam ecclesiam, remissionem peccatorum, carnis resurrectionem.

Aqvileiense.

Credo in Deo patre omnipotente, invisibili et impassibili. Et in Christo Jesu, unico filio ejus, domino nostro. Qui natus est de spiritu sancto ex Mariâ virgine, crucifixus sub Pontio Pilato, et sepultus, descendit ad inferna etc.

uti

Ro-

ma-

num

---

hoc unum monere debuisset, ne hoc opus Cypriano aut Hieronymo adscriberetur, quorum neuter in aquileiensi ecclesiâ gratiam lavacri suscepit.

Et in Spiritu Sancto, sanctam ecclesiam, remissionem peccatorum, hujus carnis resurrectionem.

Orientale.

Gredo in unum Deum patrem omnipotentem; et in unum dominum nostrum Jesum Christum, unicum filium ejus. Qui natus est de spiritu sancto ex Mariâ virgine. Crucifixus etc.

uti  
Ro-  
ma-  
num

Et in Spiritum Sanctum etc.

uti  
Ro-  
ma-  
num.

Tres hasce formas inter se comparatas cummuni symboli apostolici nomine ornavit, ad quod condendum apostolos, prius quam à se invicem discederent, convenisse narrat<sup>56)</sup>. Quamvis autem plures patres symbolum ali-quod ad apostolos auctores retulerint<sup>57)</sup> aliique singulas ejus particulas cuique adscribere conati sint<sup>58)</sup>, constat

---

<sup>56)</sup> Comment. in Symb. Apost. cap. 2.

<sup>57)</sup> Ambros. Epist. 42. p. 967. Volum. 2. edit. Bened. credatur symbolo apostolorum, quod ecclesia Romana intermeratum semper custodit et servat.

<sup>58)</sup> August. Opp. Volum. 5. edit Bened. App. p. 277 Sermo 240 & 241. Hoc symbolum, quod nomen Augustini mentitur, cujus vero in germanis ejus monumentis nulla sunt vestigia, ita se habet:

tamen, certam symboli formam, quæ fere nullibi eadem fuit, si ut factum historicum spectatur, ad apostolos non esse referendam, sed partim e fidei regulis ab Irenæo ac Tertulliano traditis<sup>59</sup>), et ad hæreticos refellendos, cum apostolicis, allatis, partim ex antiquissimis ad apostolos fere pertinentibus fidei formulis a catechumenis primævæ ecclesiæ pronuntiandis, sensim sensimque coaluisse<sup>60</sup>). Sed, omisis argumentis historicis, quæ symbolo originem apostolicam abrogant, monere mihi liceat, tale susceptum, neque cum mente apostolorum indoleque christianâ, neque cum genuina fidei notione convenire videri. Quemadmodum

---

Petrus dixit: credo in Deum patrem omnipotentem, creatorem cæli et terræ; Andreas dixit: et in Jesum Christum, filium ejus, unicum Dominum nostrum; Jacobus dixit: qui conceptus est de spiritu sancto, natus ex Mariâ virgine; Johannes dixit: passus sub Pontio Pilato, crucifixus mortuus et sepultus; Thomas dixit: descendit ad inferna, tertiâ die resurrexit à mortuis; Jacobus dixit: ascendit ad cælos, sedet ad dexteram Dei patris omnipotentis; Philippus dixit: inde venturus est judicare vivos et mortuos; Bartholomæus dixit: credo in spiritum sanctum; Matthæus dixit: sanctam ecclesiam catholicam, sanctorum communionem; Simo dixit: remissionem peccatorum; Thaddæus dixit: carnis resurrectionem; Matthias dixit: vitam æternam. cfr. Walchii Biblioth. symbolica p. 68 et 69.

<sup>59</sup>) Irenæus adv. Hæres. L. I. c. 10. p. 48 edit. Massueti, Lib. 3. cap. 4. p. 178. Tertull. cont. Praxeam cap. 2. de præscript. adv. Hæret. c. 13. Lib. de virginib. velandis c. 1.

<sup>60</sup>) cfr. Muller, Den christne Kirkes altn. Symbol. p. 59. etc.

enim apostoli christum ecclesiæ caput et fundamentum esse sæpissime inculcârunt, sic etiam liberam vitæ christianæ enucleationem à fide in christum oriundam, quocunque modo promovere conati sunt, quibus conatibus impediendis, constans, nec ullo modo commovenda oris externa professio, in ipsis literarum ductibus ubique consentiens, christianis obtrudenda, inserviisset; deinde quoque repugnat fidei eorum in Summi Numinis providentiam, indolem religionis christianæ genuinam per omnem temporum varietatem vindicaturam, et perversioni de vi divinâ in doctrinâ coelitus depositâ, in piis mentibus fidem sua sponte provocaturâ; huc accedit, quod talis labor, cujus auctoritas solis auctorum nominibus iuunteretur, ab apostolorum agendi ratione plurimum abhorret, quippe qui ab omni ostentatione alienissimi, in propagandâ religione ad Deum omnia referrent, et à personalitate suâ, quasi tenebris obvolutâ, animos aliorum ad lucem doctrinæ convertere studerent. At Rufinus, in origine symboli exponendâ, aliquam certe traditionem secutus est, et nil impedit, quominus argumentum, cum doctrinâ biblicâ conspirans, ad apostolos auctores referatur.

### § 16.

Ad symbola à Rufino commemorata redeuntibus, de unâquaque horum inter se discrepantium formâ, nonnulla nobis monenda sunt.

Quod symbolum Romanum attinet, nullum exstat exemplum, quod Rufini vetustius habendum sit, siquidem, exceptis testimoniis historicis, simplicitas symbolorum ad ætatem eorum definiendam maximi momenti est. Ad

Rufini proximè accedit, symbolum ecclesiæ romanæ græcum quod Marcellus Ancyranus recitavit<sup>61)</sup>, et aliud græcum ab Usserio e codice seculi octavi descriptum<sup>62)</sup>. At post Rufinum symboli Romani latini antiquissima apud Leonem vestigia reperiuntur<sup>63)</sup>, quæ non nisi initium ejus continent, ita se habens: Fidelium universitas profitetur, credere se in Deum patrem omnipotentem et in Jesum Christum, filium ejus unicum, dominum nostrum, qui natus est de Spiritu sancto et Mariâ virgine. Quæ deinde sequuntur symbola romana variis incrementis aucta (ex. c. e sacramentario Gelasiano, ex ordine Romano, ex Usserio auctius) recentioris temporis sunt.

Præter commemoratam à Rufino Symboli Aqvileiæ formam, duæ etiam aliæ exstant, quas Maria de Rubeis in lucem produxit<sup>64)</sup>, de tempore autem, quo in consuetudinem ecclesiæ Aqvileiæ pervenire coeperint, hoc unum ex eo discimus, adservatas fuisse à Lupo sive Lupone, qui sacris illius urbis gubernandis post annum 855 admotus fuit. Quo autem discrimen inter has omnes luculentius appareat, utramque formulam cum Rufinianâ conferendam hic apponamus:

61) Epiphan. Hæres, 72. § 2. 3. Tom. 1. p. 835 et 836.

62) cfr. Walchii Bibl. Symb. p. 58.

63) Leonis magni ad Flavianum de Eutychis lite epistola c. 2. p. 242. Tom. 1. edit. Quesnellii. à Walchio commemoratum p. 59.

64) Maria de Rubeis Dissert. de liturgicis ritibus eccles. Forojul. p. 242. 243. 249. et dissert. variæ erudit. p. 18. 19. cfr. Walchii Bibl. symb. p. 55.

## 1.

Credo in Deum patrem omnipotentem. Et in Jesum Christum, filium ejus unicum, dominum nostrum. Qui natus est de spiritu sancto ex Mariâ virgine. Sub Pontio Pilato crucifixus est et sepultus. Tertiâ die resurrexit à mortuis. Ascendit in coelum, sedet ad dexteram patris, inde venturus est, judicare vivos et mortuos. Credo in spiritum sanctum. Sanctam ecclesiam. Remissionem peccatorum. Carnis resurrectionem.

## 2.

Credo in Deum patrem omnipotentem. Et in Jesum Christum, filium ejus unicum, dominum nostrum. Qui natus est de Spiritu sancto ex Mariâ virgine. Sub Pontio Pilato crucifixus est et sepultus. Tertiâ die resurrexit vivens à mortuis. Ascendit in coelum. Sedet ad dexteram patris. Inde venturus est judicare vivos et mortuos. Credo in Spiritum sanctum. Sanctam ecclesiam catholicam. Remissionem peccatorum. Carnis resurrectionem et vitam æternam.

Si hæ formulæ una cum alterâ conferuntur, manifestum esse puto, ad idem tempus utramque non pertinere, cum illa ad simplicitatem primævam longe propius accedat nec a formulâ Symboli Romani Rufinianâ multum differat, vocabula vero: vivens — catholicam (vitam æternam) huic addita, recentius tempus redoleant. Verum illa non solum hæc, sed Rufinianâ quoque symboli aqvileiæ formulâ vetustior esse videtur, quippe quæ, nec descensus Christi ad inferos, nec hujus carnis resurrectionis mentionem ullam faciat. Utra vero Rufini an auctior illa symboli



formula recentior habenda sit, pro certo vix definiiri poterit, cum utraqve suis, etsi diversis, incrementis laboret. Ceterum de singulis Symboli aqvileiensiſ, à Rufino commemorati, particulis infra agemus, prouti illius de qvovis fidei catholicæ articulo examinanda professio requiret.

Qvod formulam Symboli orientalis supra commemorati attinet, Rufinum, non tam de symbolo aliquo à toto oriente, qvam à certis qvibusdam ecclesiis, et, nominatim Hierosolymitanâ, aut Alexandrinâ recepto cogitâsse, suspicionem movet finis apologiæ ejus ad Anastasium, ubi hæc leguntur: ego autem, inquit, præter hanc fidem, qvam supra exposui, id est: qvam ecclesia Romana et Alexandrina et Aqvileiensiſ nostra tenet, qvæqve Hierosolymis prædicatur, aliam nec habui unquam, nec habeo in Christi nomine, nec habebo etc., qvæ sententia eo etiam confirmari videtur, qvod complures in utroqve loco annos transigit; tanto magis mireris, formulam ejus, neqve cum symbolis ecclesiæ Hierosolymitanæ apud Cyrillum, neqve cum Alexandrinæ, qvæ Arins, Alexander ac Epiphanius rectulerunt, consentire. — Nec si ad Cæsaream vel Antiochiam transierimus, ullam cum harum exclesiarum symbolis similitudinem habere reperietur.

Ex tribus hisce symbolis, Romano propter intemperatam simplicitatem primas deferendas Rufinus monuit, cujus causam inde derivat, qvod neqve hæresis ulla exordium Romæ sumsisset, et antiquus mos ibi servatus fuisset, eos, qvi gratiam baptismi suscepturi essent, publicè symbolum reddere, cum utiqve adjectionem unius saltem sermonis,

eorum, qui in fide præcessissent, auditus non admitteret<sup>65</sup>); quæ effata vitio ei vertuntur, quasi publicam fidei professionem, pluribus locis communem, ad Romanos solos trahere voluisset<sup>66</sup>). Hæc autem criminatio e verbis ejus non rite observatis profecta est, nec ex iis elici potest; id enim unice contendit, additamenti difficiliorem aditum patescere, ubi professio fidei publico auditorum examini subjiciatur, quem morem antiquum cum ecclesia romana servaverit, symbolum quoque illius plus simplicitatis retinuisse, quam in iis locis, ubi consuetudo ista obsoleta abrogataque sit. Agit igitur de hujus moris retinendi utilitate, nec in eo, quot illum ecclesiæ retinuerint, examinando versatur. — Ceterum ad conformitatem symboli, quam publica fidei professio tueri potuisset, destruendam, et ad varietatem variis in locis provocandam, haud parum contulisse videtur, quod, Rufini aliorumque patrum testimonio<sup>67</sup>), symbolum literis non mandari, sed memoriâ retineri solebat, ut certum esset, neminem ex lectione quæ interdum pervenire etiam ad infideles soleret, sed apostolorum traditione didicisse<sup>68</sup>).

### § 17.

Rufinus de naturâ divinâ disputans in notionibus quam maximè spiritualibus adhibendis semper sibi constat<sup>69</sup>) et

<sup>65</sup>) Comment. in Symb. Apost. num. 3.

<sup>66</sup>) Muller, om den christne Kirkes alm. Symb. p. 102.  
Nota.

<sup>67</sup>) Comment. in Symb. Apost. n. 2. August. Sermo 214 § 1.  
Hieron. Epist. 61 Ad Pammachium.

<sup>68</sup>) Rufin. l. c.

<sup>69</sup>) Apol. Lib. 1. n. 17 et 18. Comment. in Symb. n. 4. ubi

Origenem hac in re sequutus est, qui omnem corporis notionem à Deo omnino amoveri voluit, et visibilitatis vocabulum, cui corporis notio adhæreret, contra Valentinianos et Andropomorphitas de Summo numine adhiberi posse negavit<sup>70</sup>), quod deinde hostes in eo reprehenderunt<sup>71</sup>). At hi iterum ab Origenis fautoribus Andropomorphitarum nomine notati sunt, et Epiphanius, cum anno 394 Hierosolymis in Origenem, ut Arii patrem et aliarum hæreseon radicem perorare coepisset, à concionando desistere jussus est per episcopum Johannem, qui paullo post, contra hæreticos andropomorphitas, formam humanam Deo tribuentes, Origeni omnino oppositos, concionem habuit, quibus Epiphanium ejusque assecclas designavit. Attamen plures patres cum Rufino et Origene in invisibilitate naturæ divinæ vindicandâ consentiunt, maximeque Augustinus, qui dicit Deum naturâ invisibilem esse, nec ab ullo unquam visum, quia eam, quæ in Deo habitat, plenitudinem divinitatis nemo mente aut oculis comprehendere possit<sup>72</sup>). Motis itaque in ecclesia de visibilitate Dei quæstionibus ac suffragiis in utramque partem divisus, vocabula impassibilis et invisibilis, polemico certe consilio,

---

dicat, Deum esse sine initio, sine fine, simplicem, sine ullâ admistione, invisibilem, incorporeum, ineffabilem, inestimabilem, in qua nihil adjunctum, nihil creatum sit.

<sup>70</sup>) Origen cont. Cels. Lib. 7. num. 37. p. 720 et *περὶ Ἀρχῶν* Lib. I. cap. 1. n. 5 et 8. p. 51 et 53. cfr. etiam Comment. in Cantica Cantic. Lib. 3. p. 84.

<sup>71</sup>) Apol. Lib. 1. n. 17 et 18.

<sup>72</sup>) August. epist. 147.

formulae Symboli Aquileiensis addita Patripassianisque imprimis opposita sunt, qui patrem ipsum vel ex virgine natum et in carne passum affirmarunt.

### § 18.

Metaphysicam incarnationis divinæ disquisitionem Rufinus disavasit, metuens, ne, si in hujus, ut ait, arcani profundo nos curiosius ingeramus, forte, dum innaccessæ lucis fulgorem pertinacius perscrutamur, exiguum ipsum, qui mortalibus divino munere concessus est, aspectum perdamus<sup>73</sup>). Quæ effata primo quidem aspectu cum Rufini scripta Origenis in occidente quam maximè commendandi conatibus constare non posse videntur; sed observandum est, oculis Rufini litem Ariguam, e disputationibus de naturâ Christi ortam, observatam fuisse, persvasumque illum habuisse, disquisitiones speculativas, cum pro iis, ut aris et focis, pugnaretur, ad fidem enucleandam adeo nihil conducere, ut potius discordiam et inutilia certamina provocarent. Attamen minime improbavit omnem rerum divinarum examinationem, et ne quidem ipsius incarnationis, si modo eam, quam monstraret, viam disquirentes sequi vellent. Monet nimirum, in quæstione hac de re institutâ à terrestribus primum esse incipiendum indeque sensim, quasi per gradus, ad cælestia emergendum, ablegatque rerum divinarum studiosos ad naturam humanam prius diligenter examinandam, quibus monitis, similitudinibus pulcherrimis ornatis<sup>74</sup>), ab ecclesiæ catho-

---

<sup>73</sup>) Comment. in Symb. § 4.

<sup>74</sup>) l. c.

licæ agendi ratione, rebus spiritualibus, quasi manibus pro lubitu contrectari possent, permanentem, nec ullo modo commovendam speciem præbere studentis, alienum se exhibuit. Nec enim similitudinibus, e rebus terrestribus sumtis, notionem divinitatis omnino exhauriri duxit, cum eam siue exemplo esse, et in theoriâ incarnationis hoc præ ceteris cavendum asseruerit, ne carnalis nativitatis cogitationem assumamus <sup>75)</sup> etsi christus carnem naturæ humanæ atque animam per spiritum sanctum suscepit.

### § 19.

De modo quippe, quo Christus natus sit, Rufinus disputans et in id inqvirens, quomodo filius Dei e virgine gigni potuerit, animam Christo tribuit, ita ut non principaliter soli carni sociatus, sed animâ inter carnem Deumque mediâ, generatus sit; hac enim mediâ et in secreta rationabilis spiritus arce verbum Dei capiente, Deum ex virgine nasci potuisse statuit; et ideo nihil turpe ibi esse putandum, ubi sanctificatio spiritus inesset, et anima, quæ Dei capax esset, particeps etiam carnis fieret. In his Rufinus cum aliis patribus ecclesiasticis omnino consentit, siquidem Augustinus <sup>76)</sup>; invisibilis inqvit, et incommutabilis veritas, per spiritum animam et per animam corpus suscipiens, toto homine assumpto, ab omnibus eum infirmitatibus, nullâ sui contaminatione liberavit; alioque loco <sup>77)</sup>: verbum autem incommutabile, nihil in deterius h

---

<sup>75)</sup> Comment. in Symb. n. 7. Apol. ad Auast. n. 3.

<sup>76)</sup> August. De Agone christ. cap. 18.

<sup>77)</sup> — Epist. 140. n. 12.

commutatam, particeps carnis effectum est, rationali animâ mediante. Et uterque convenit cum Origene, qvî dicit, animam medium qvoddam esse inter carnem infirmam et spiritum<sup>78)</sup>. His etiam congrua sunt antiquorum Symbolorum effata; ita Definit. Concil. Calced. de persona Christi. — Θεον ἀληθως καὶ ἄνθρωπον ἀληθως τον αὐτον εκ ψυχης λογικης και σωματος, etc. Symb. Athanas. n. 30. τελειος θεος, τελειος ἄνθρωπος εκ ψυχης λογικης και ἄνθρωπινης σαρκος βσιωθεις. [αὐτος ἑαυτῷ συν τῷ συμφυει αὐτῷ παναγιῷ πνευματι, δημιεργησας την παναγιαν της σαρκος προσληψιν. Τελειαν ἑσῖαν, ἀνθρωπίνην, ἐνυποστατον αὐτῷ και ἀδιαιρετον ἐξ αὐτῷ, ἁμαρτίας ἀμεθεκτον. εκ των παρθενικων ἄγνωι ἁματιων της Θεομητορος συμπανεντος τῷ σωματος, χωρις τινος Θεληματος ἢ ἐννοεματος σαρκικῷ. Τῆς δε ψυχης αὐλως κτίσθεις, νοεμας, λογικης, Θελητικης, ἐνέργητικης, ὅλης τεθειωμενης συν τῇ σαρκι, ἐξ αὐτης ἀρχης, ἐκ πρώτης ὑπαρξεως, δια την προς αὐτον τον θεον λογον ἀκραν ἐνωσιν, ἀσυγχυτον καθ' ὑποστασιν]. Damasci confess, fidei cathol. anathematism. 7. Ἀναθεματιζομεν κακεινους, οἱτινες ἀντι λογικης ψυχης δίσχυριζονται ὅτι ὁ τῷ θεῷ λογος ἐξραφε ἐν τῇ ἀνθρωπινῇ σαρκι. αὐτος γαρ ἕτος ὁ τῷ θεῷ λογος ἀντι της λογικης και νοερας ψυχης ἐν τῷ ἑαυτῷ σωματι γεγονεν, ἀλλὰ την ἡμετεραν, τῷ τῷ, λογικην και νοεραν ἀνευ της ἁμαρτίας ψυχην ἀνελαβε και ἐσωσεν. Symb. Theodori Mopsvesteni — ὅτι ὁ δεσποτης θεος λογος ἄνθρωπον ἐληλφε Τελειον ἐκ σπερματος ὄντα Ἀβρααμ και Δαυιδ, κατα την διαγορευσιν των θείων γραφων, τῷ τῷ ὄντα την

<sup>78)</sup> περὶ Ἀρχῶν Lib. 2. cap. 8. p. 96.

φυσιν, ὅπερ ἦσαν ἐκείνοι ὥνπερ ἐκ σπέρματος ἦν, ἀνθρώπον  
τελείον την φυσιν, ἐκ ψυχῆς τε νοεράς καὶ σαρκὸς συννεστώτα  
ἀνθρωπίνης. Symbol. Pelagii — Sic autem confitemur in  
Christo, unam filii esse personam, ut dicamus duas esse  
perfectas atque integras substantias, id est: Deitatis et  
humanitatis, quæ ex animâ continetur et corpore, atque,  
ut condemnamus Photinum, qui solum et nudum in Christo  
hominem constitetur, ita anathematizamus Apollinarem et  
ejus similes, qui dicunt, Dei filium minus aliquid de hu-  
manâ suscepisse naturâ, et vel in carne, vel in animâ,  
vel in sensu adsumtum hominem, his, propter quos ad-  
sumtus est, fuisse dissimilem, quem absque solâ peccati  
maculâ, quæ naturalis non est, nobis confitemur conformem.  
Symb. Toletanum. Si quis dixerit vel crediderit car-  
nem tantum sine animâ à filio Dei fuisse susceptam, ana-  
thema sit. Quid autem sibi velint hujusmodi sententiæ,  
ut videatur, notandum est, eas rationibus polemicis, quas  
symbolum Pelagii innuit, provocatas esse; cui rei primam  
occasionem dedit Apollinaris, episcopus Laodicensis, cum  
receptam jamdudum ab antiquis sententiam inculcaret, lo-  
gon in Christo modo cum corpore humano et animâ sen-  
tiente conjunctum fuisse et locum mentis occupâsse.  
Sed observandum quoque est, hæc duo nomina, spiritum  
et animam non ut res diversas à patribus spectari, sed  
unius ejusdemque animæ, videlicet rationalis, officia his  
significari (cfr. quæ supra ex Augustino et Origene allata  
sunt), spiritu enim, cœ mente, intelligi voluerunt partem  
animæ superiorem (νῆν), animâ vero, partem ejus inferio-  
rem (ψυχὴν), quæ in terrestribus humanisque occupata  
versetur.

## §. 20.

Qvod naturam Christi attinet, Rufinus cum ecclesiâ catholicâ contra Arianos unam ei eandemque cum patre immortalem deitatis substantiam tribuit<sup>79</sup>), et hic ab Origene differt; ille enim, Dei patris et filii, qvi eandem non haberent hypostasim, unitatem in unâ concordia, consensione ac voluntatis identitate collocavit<sup>80</sup>); qvam moralem utriusque harmoniam Rufinus non nisi obiter commemoravit<sup>81</sup>). Triplex mortis Christi consilium statuit, ut nobis qvippe obedientiæ exemplum piis etiam susceptâ morte servandum proponeret<sup>82</sup>); deinde, ut nos sanguine suo redi-

<sup>79</sup>) Comment. in. Symb. n. 5.

efr. Symb. Nicæn. — *γεννηθεντα εκ της πατρος μονογενη, τω πατρι, εκ της υιας τῷ πατρι, Θεον εκ Θεου, φως εκ φωτος, Θεον ἀληθινον εκ Θεου ἀληθινου, γεννηθεντα ὃ ποιηθεντα ὁμοιοιον τῷ πατρι.* Similiter Symbolum Constantianopolitanum. Definit. Concil. Calcedan. de personâ Christi: *ὁμοῖοιον τῷ πατρι κατα την Θεοτητα και ὁμοιοιον τον αυτον ἡμιν κατα την ἀνθρωποτητα.* Formula Seleuciensis: *το δε ὁμοιον τῷ ὡς προς τον πατερα οαφως ὁμολογουμεν κατα τον αποστολον, τον λεγοντι περι του υἱου, ὅς ἐστιν ἐκων της Θεου της ὡρατης.* Symb. Pelagii: — *verum Dei filium, non factum, aut adoptivum, sed genitum et unius cum patre substantiæ, qvod Græci dicunt ὁμοιοιον.* Symb. Theod. Mopsvesteni: *πίστευομεν δε και εις ἕνα Θεον ὡν μονογενη, εκ της υιας ὄντα της πατρως, ὄντως ὡν καὶ της αὐτης υιας ὄντα, ὅπερ ἐστὶ καὶ πιστευεται ὡς.*

<sup>80</sup>) Origen. cont. Cels. Lib. 8. num. 12 et 13. p. 750 et 751.

<sup>81</sup>) Comment. in Symb. n. 6.

<sup>82</sup>) I. c. n. 14 et 15.



meret<sup>83</sup>); denique, ut nos ex imperio dæmonum eriperet<sup>84</sup>); neque hac in re sequutus est Origenem, qui quantum eoque scio—consilium Christi mortis cum dæmonologiâ nusquam conjunxit, nec de morte illius aliud tradidit, quam quod pro hominibus moriendo omni creaturæ esset profuturus<sup>85</sup>), vim autem Jesu nominis piâ mente pronuntiati ad dæmones in fugam conjiciendos sufficere credidit<sup>86</sup>), quin immo, ab ipsis piis christianis dæmonum impetus repelli irritosque reddi posse<sup>87</sup>); quod igitur exiguum dæmonum imperium continuari statuit<sup>88</sup>), Rufinus morte Christi eversum putavit, quâ in re Augustinus cum Rufino eatenus consentit, quod non dæmonum, sed diaboli potestatem morte Christi sublatam commemoravit; namque ex ejus sententiâ Diabolus ab eo inde tempore, quo feminam primam decepit, totum genus humanum tanquam suæ arboris fructus non iniquo possidendi jure retinuit, donec justum interfecit, in quo nihil morte dignum posset ostendere. Justissime igitur credentes in Chris-

---

83) Apolog. Lib. 2. n. 44.

84) Comment. in Symb. n. 6.

85) Origen. e. Cels. Lib. 1. n. 54. p. 369. et lib. 2. n. 23. p. 408.

86) Orig. e. Cels. l. 1. n. 6. p. 325.

87) l. c. Lib. 8. n. 35 et 37. p. 768 et 769.

88) Origenes duplicem malorum dæmonum in homines operationum speciem amplexus est, cum aut totam hominis mentem occuparent et ad insaniam redigerent, aut cum sentientem quidem et intelligentem animum cogitationibus variis et sinistris pervasionibus inimicâ suggestionem depravarent cfr. περί Ἀρχῶν Lib. 3. cap. 3.

tum, quem injustissime occidit, dimittere coactus est<sup>89</sup>). Descensum Christi ad inferos, quæ verba nec in Romano, nec orientali inveniuntur, in symbolo Aquileiensi Rufiniano addita esse, supra in § 15 commemoratum est; cui formulæ incremento occasionem præbuisse Arianos quosdam et Apollinaristas, qui mentem Christo subtraxerunt, animâ sentiente concessâ, ita ut vices mentis divina ipsa natura obliisset, docti plerique theologi crediderunt inde ab Amando Polano (Syn- tagm. Theol. Chr. L. 6. c. 21. p. 742—747. edit. Francof. et Hanov. 1655), qui hanc sententiam primus breviter proposuit, et Petro King, qui in Historiâ symboli apostolici eam fusius explicavit; Sed recentissimis temporibus Mün- scher (Handb. der christl. Dogmengesch. IV. p. 412.), Neander (Allgem. Gesch. der christl. Rel. u. K. 2. p. 923. n. 1.) ac nuperrimè Waage in dissertatione suâ, de ætate articuli, quo in symbolo apostolico traditur Jcsu Christi ad inferos descensus (edit. Havniæ 1836), hypo- thesin istam in dubium vocare et refellere aggressi sunt; quo- rum hic, variis nudique argumentis hunc in finem adductis, ostendit, de descensu Christi ad inferos articulum nec ab omnibus patribus ad Apollinaristas refutandos adhibitum esse, cum a clarissimis illorum, Gregoriis quippe Nazian- zeno et Nysseno, Chrysostomo, Augustino, neglectus sit, nec à quibus allatus sit, maioris quam cetera argumenta haberi, quippe cui hoc nomine singularis aut peculiaris vis nunquam adscripta fuerit; monuit quoque ne tum qui- dem primum hunc articulum symbolo insertum esse, sed ante jam passim, quemadmodum diu etiam postea non

---

<sup>89</sup>) August. de libero Arbitrio Lib. 3. n. 31.

possit per universam ecclesiam receptus esse dici. Kingius autem ad hypothesin istam amplectendam eo delatus est, quod hic articulus in expositione Symboli apostolici Rufiniana sub finem seculi quarti conscripta legatur; et cum Rufinus n. 18. verba: descendit ad inferna, nec in ecclesiae Romanae, nec in orientis ecclesiarum symbolis haberi testaretur, cumque hujus additamenti causam ad ea, quae Rufinus in n. 3. de additamentorum origine monnerat, relatum, in lite aliquam ecclesiastica ad haeresin arcendam, sibi fingeret quaerendam esse, lis apollinaristica, quae tunc temporis ecclesiam perturbabat, ad rem enodandam opportuna illi visa est. Sed Kingius et qui hanc hypothesin ex effatis Rufini cum eo elicere studuerunt, aut, qui eam impugnantes ad vagam Rufini nec magis aestimandam in rebus tradendis fidem provocare necessarium duxerunt, plus verbis illius, quam iis revera inest, indidisse videntur. Primum enim observandum est, quod in hac re gravissimi momenti esse, nemo facile negabit, Rufinum, articulum de descensu Christi ad inferos ad haeresin aliquam arcendam symbolo Aquileiensi additum, ne uno quidem verbo indicasse; in num: quidem 3. Romanae ecclesiae symbolum additamenti ideo carere commemoravit, quod haeresis nulla illic exordium sumpsisset, sed haec in universum omnino, idque recte, monita sunt, cum consilio polemico incrementa symbolorum originem suam plerumque debeant, neque tamen ad hanc causam, Symboli Romani simplicitatem, unice restrinxit, namque subinde mox aliam addidit, scilicet publice et populo audiente symbolum reddere; verba igitur hujus loci non impediunt, quominus ad harum neutram, sed ad aliam

aliquam causam articulus sæpe nominatus Symbolo aqvi-  
leiensi additus referatur, præsertim eum tempus, quo in  
illud irrepserit, silentio omnino præterierit. Nec illud  
magis fidem Rufini in hac re dubiam reddere videtur,  
quod hunc articulum in Romano et orientis ecclesiarum  
symbolis inveniri negavit, cum nec de aliis, quam quæ  
ipse recitavit, symbolorum formis loquatur, nec ad aliarum  
ecclesiarum symbola verba sua extendat.

Uteunque res se habet, multi patres antiqui in his de-  
finiendis articuloque de descensu Christi ad inferos enu-  
cleando, duobus Novi Testamenti locis notissimis<sup>90)</sup> in-  
nixa desudabant\*), quorum dum alii alio Christum con-  
silio ad inferna descendisse putarent, Augustinus mortuos  
aliquos à doloribus liberandi causa animam ejus illuc ve-  
nisse statuit; utrum vero omnes, quos ibi invenerit, an  
quosdam, quos illo beneficio dignos judicaret, e poenis  
eripuerit, definire non ausus est, nemine, qui in horum  
numero habendus sit, nominato præter Adamum, quem  
inde à Christo solutum fuisse totam ecclesiam affirmare

<sup>90)</sup> Ephes. 4, 9. 1 Petr. 3. 19—20.

\*) alii descensum Christi ad statum exinanitionis alii ad  
statum exaltationis retulerunt, nec minus in iis defi-  
niendis, quibus hæc evangelii prædicatio cum liberatione  
ex inferno conjuncta contigerit fluctuârunt, ita Tertull.  
in Libro de animâ cap. 7 et 55 salutem e descensu Christi  
oriundam ad prophetas et patriarchas solos restrinxit; ii  
autem, qui omnes esse liberatos ex inferno asseruerunt,  
in hæreticorum numerum seculo 4to relati sunt. cfr. Au-  
gust. hæc. 79.

tradidit<sup>91)</sup>; omnium autem primus Origenes hoc dogma excoluit, statuens, animam Christi postquam corpore exuta erat, ad inferos descendentem, cum animabus corpore nudis, colloquia habuisse, et eas, quæ voluerint, aut quas eertis quibusdam rationibus sibi notis videret ad argumenta sua amplectenda magis idoneas, ad se convertisse<sup>92)</sup>. Hic quoque Rufinus magistrum relinquens, per descensum illum Christi ad inferos nil nisi sepulturam significari voluit, quæ, utrum sanitate iudicii ductus monuerit, an metu, ne doctrina de animabus mortuorum a Christo conversis et a doloribus liberatis, ad æternitatem poenarum refellendam aliquid facere videretur, aliis iudicandum relinquo. Christum vere mortuum esse, vereque resurrexisse cum Origene æque ac ecclesiâ catholicâ affirmavit<sup>93)</sup>; sed in eo ab Origene discrepat, quod in eadem ipsâ carne, quæ deposita fuerat, Christum post resurrectionem in coelos ascendisse statuit<sup>94)</sup>. Sufficiat monuisse Rufinum cum ceteris patribus, perpetuam Mariæ virginitatem, sacræ

91) August. epist. 164. n. 6. 7. 8. cfr. etiam epist. 187 n. 4 etc.

92) Orig. c. Cels. Lib. 2. n. 43. p. 419.

93) Comment. in Symb. n. 7.

94) Origenem statuisse, Christum post resurrectionem, corpus æthereum, seu spirituale, nactum esse, ex Hieron. Epist. 38 ad Pammachium apparet, et e doctrinâ ejus de carnis naturâ sequitur. Ceterum sane mirum videtur, Dochetarum sententiam non amplexum esse, qui apparens corpus Christo tribuerunt ideoque verè mortuum esse negarunt.

scripturæ locis perperam applicatis, vindicare aggressum esse\*).

## § 21.

Quemadmodum historica Dei revelatio religionis positivæ fundamentum efficit, sic etiam persuasio de spiritali cum Summo numine consortio ad quamcunque religionem pertinet; cujus propriam religioni christianæ formam fides in Spiritum Sanctum exprimit; ille enim virtutem et pios conatus in ecclesia promovens, Dei amantes ad sanctitatem spiritualemque cum Deo communionem perducit; quamdiu igitur mutuus inter hanc doctrinam ac desiderium religiosum nexus primos christianos occupatos tenebat, in relatione spiritus sancti ad ecclesiam sanctitati studentem, salutaribusque ejus in coetu christiano operationibus contemplandis acquieverunt, at rebus theologicis ad forum speculativum traductis, prouti notiones dissecari et accuratius distingvi captæ sunt, a munere atque beneficiis Spiritus Sancti considerandis, ad naturam ejus examinandam disputatio scse convertit, unde dogma de trinitate conflatum est. In hoc dogmate enucleando, Rufinus ad terminos ab ecclesiâ catholicâ receptos prope accessit, triunitatem in subsistentibus personis admittens, unitatem in naturâ atque substantiâ, et ad distingvendas

---

\*) Comment. in Symb. n. 10 et 11. loca scripturæ sacræ ibi applicata, sunt: Esai. 7. 14. Ezech. 44. 1. Matth. 1. Luc. 1. 3. cfr. quoque Hieron. Libr. adv. Helvid. n. 3—19. Epiph. Hæres. 78. p. 1055. Ambros. De institutione virginis.

personas vocabula adfectionis ita secrevit, ut pater, ex quo omnia essent, filius, qui ex patre natus esset, et Spiritus Sanctus, tanquam de utroque procedens intelligeretur<sup>95</sup>); quæ fere eadem verba antiqua symbola exprimunt; nempe: Symb. Athanas. n. 24: και ἐν ταυτῇ τῇ τριαδὶ ὅδεις πρῶτος, ἡ ἑσχάτος, ὅδεις μέγας ἡ μικρός, ἅλλα αἱ τρεῖς ἄνται ὑποστάσεις αἰωνιαὶ τε ἴσαι καὶ ἴσαι ἐς πάντα. et n. 25. μοναδὰ γέν ἐν τριαδὶ, καὶ τριαδὰ ἐν μοναδὶ πας χριστιανὸς ἐνσεβείσθω. Damasi confessio fidei catholicæ, anathematism. 20. εἰ τις μὴ εἴπῃ τὸ πατὴρ καὶ τὸ υἱὸς καὶ τὸ ἅγιον πνεύματος μιὰν θεότητα, ἑξέστιαν, δυναστείαν, μιὰν δόξαν, κυριότητα, μιὰν βασιλείαν, μιὰν θελήσιν, καὶ ἀληθειαν, ἀναθέμα ἔστω. Symb. Theodori Mopsvestini: ὁμολογούμεν δὲ πατέρα τέλειον πρόσωπον καὶ υἱὸν ὁμοίως καὶ πνεῦμα ὡσάντως. σωζόμενοι τὸ λόγος τῆς ἐνσεβείας ἡμῖν, τὸ πατέρα καὶ υἱὸν, ὁμοίως καὶ πνεῦμα ἅγιον μὴ τρεῖς τινας διαφορὰς θείας νομίζειν, ἀλλὰ μιὰν τῇ ταυτότητι τῆς θεότητος γνωριζομένην. Symb. Pelagii: Non enim nomina tantummodo, sed etiam nominum proprietates, id est, personas, vel, ut Græci exprimunt, hypostases, hoc est: subsistentias confitemur — itaque substantiâ unum sunt, personis ac nominibus distinguuntur. Symb. Tolletanum: credimus in — hanc trinitatem, personis distinctam, substantiâ unitam, virtute et majestate invisibilem, indifferentem. His symbolorum de Trinitatis dogmate effatis, alii etiam patres ecclesiastici consentiunt; ita Augustinus, trinitatem esse unius ejusdemque naturæ atque substantiæ testatur, non in singulis minorem quam in

<sup>95</sup>) Apolog. ad Anastas. n. 2.

omnibus, nec majorem in omnibus, quam in singulis, sed tantam in solo patre vel in solo filio, quanta in patre simul et filio, tantamque in solo spiritu sancto, quanta simul in patre et filio et spiritu sancto sit<sup>96</sup>). Qvemadmodum vero Rufinus hoc dogma amplexus est, ita nunquam concessit, Origenem hac de re aliter sensisse, si usquam in libris ejus alius fortasse sensus occurrere videatur<sup>97</sup>). Quamvis autem Origenes Spiritum sanctum passim commemoratum ita definiierit, ut sit subsistentia intellectualis, quæ propriè subsistat et exstet<sup>98</sup>), nec non doctrinam de filio Spirituque sancto subtilius, quam antea factum erat, excolendo, viam trinitatis dogmati enucleando munierit, datâ tamen illum operâ de trinitate in libris suis egisse nusquam reperi; nec mirum, cum, si fides habenda est versioni Rufinianæ, — solam trinitatem esse contendat, quæ omnem intelligentiæ sensum, non solum temporalis, verum etiam æternalis excedat<sup>99</sup>), quibus cum effatis æque ac fide catholicâ non facile conciliari poterit, quod ampliorem filii potestatem, quam Spiritus Sancti esse

---

<sup>96</sup>) August. epist. 170. n. 5.

<sup>97</sup>) Apol. Lib. I. n. 20. Quatuor, ait, libri sunt isti: *περὶ Ἀρχῶν*, quos interpretatus sum, in quibus de Trinitate sparsim per singulas pene paginas disputatur. Relegantur universa, si usquam talis aliquis de Trinitate inventus fuerit in interpretatione nostrâ sensus, qualem in isto capite calumniantur, tum demum credatur, etiam hoc, eo sensu, quo isti confingunt, esse prolatum.

<sup>98</sup>) *περὶ Ἀρχῶν* lib. I. c. 1. n. 3. p. 50.

<sup>99</sup>) — — lib. 4. n. 28. p. 190.



statuit<sup>100)</sup>; unde Epiphanius Origenianos<sup>101)</sup> reprehendit, quod filium et Spiritum sanctum *κτίσμα* appellarent creatisque in rebus illos numerarent<sup>102)</sup>.

<sup>100)</sup> Præter locum supra allatum e *περι Ἀρχῶν* L. 1. c. 3. n. 5. p. 62, qui huc fortasse trahi posset, quem tamen magis de diverso personarum Deitatis munere, quam potestatis discrimine agero putamus, efr. etiam Origen. Comment. in Johann. op. Vol. 4. p. 60.

<sup>101)</sup> Cavendum utique est, ne Origenis Adamantii discipuli, indeque nomen Origenianorum adepti, eum aliâ sectâ ejusdem nominis, sive Origenianis prioribus, confundantur, qui, Epiphanio teste, varios veteris ac Novi Testamenti libros apocryphos amplexi sunt (ex. e. Actus Andreæ), nuptias repudiârunt, et obscenis libidinibus sese inquinârunt efr. Epiphani. Advers. Hæres. Lib. 2. Tom. 1. hæres. 63. p. 521.

<sup>102)</sup> Epiphani. adv. Hæres. Lib. 2. T. 1. p. 398. efr. etiam Hæres. 64. p. 531. qui locus ita audit: *ὅποτε δὲ ἐν πολλοῖς τόποις εὐρομεν αὐτὸν τὸν μονογενῆ Θεὸν ἀπαλλοτριῶντα τὴν πατρὸς Θεότητός τε καὶ ὁσίας, ὁμῶς τε καὶ τὸ πνεῦμα τὸ ἅγιον, τότε χάριν τὰ γεννητὸν Θεὸν εἰρηκέναι αὐτὸν, σαφές ἐστιν, ὅτι κτιστὸν ὀφείλεται.* — Sed Epiphanius philosophicum hujus dogmatis momentum ab Origene primum enucleatum perperam intellexit. Quemadmodum enim mundum inde ab æterno creatum putavit, ita filii æternam et sempiternam generationem admisit, splendoris in modum, qui e luce gignitur. efr. *περι Ἀρχῶν* L. 1. c. 2. n. 4. p. 55. eoqve modo omnem illam mutationis notionem à Deo removit, quæ ex antiquiorum sententiâ seqvebatur, logon ad mundum creandum e Deo quasi prodiisse, ita ut *λογος ἐνδικαίωτος* in *προφορικόν* verteretur.

## § 22.

Sanctitatis idea, quæ in Christo visibili modo apparuit, in ecclesiam ejus transiit ut scopus, ad quem tendere deberet. Rationibus vero historicis, animos à genuinâ religionis christianæ indole ad externas formas muniendas avocantibus, sensim factum est, ut idea ecclesiæ cum reali ejus statu magis magisque confunderetur; quæ utriusque hujus notionis perturbatio in sententiâ istâ; extra ecclesiam nullam esse salutem, luculentissimè expressa est; quam duram et humanitati infestissimam sententiam patres complures auctoritate suâ munierunt<sup>103)</sup> et, quo societates hæreticorum e consortio christianorum excludi posset, in illis definiendis<sup>104)</sup> et certis veræ ecclesiæ chri-

---

<sup>103)</sup> Hieron. Epist. 22. 23. 109.

<sup>104)</sup> Hieron. Comment. in Epist. ad Gal. c. 5.-p. 508. omnes eos hæreticorum nomine notavit, qui sacram scripturam aliter intelligerent, quam sensus Spiritus sancti flagitaret. Augustinus, hæresin definire omnino difficile esse affirmavit. Epist. 222. p. 622. ideoque negativam modo hæreticorum descriptionem nobis reliquit. Eos quippe, qui sententiam suam, quamvis falsam atque perversam, nullâ pertinaci animositate defenderent, et præsertim, quam audaciâ præsumptionis suæ non peperissent, sed à seductis atque in errorem lapsis parentibus acceperant, quærerent autem cautâ sollicitudine veritatem, corrigi parati, cum invenerint, inter hæreticos dicere non esse habendos cfr. Aug. Epist. 43. p. 67. ille etiam inter hæreticos et schismaticos discrimen fecit cfr. De verâ Religione n. 9. p. 560. Patres quoque in notione hæresis constituendâ fluctuasse, inde apparet, quod in enumerandis hæreticis multum inter se differunt, ita Epipha-

stianæ criteriis excogitandis desudabant. Rufinus quoque hac in re aliquid præstare voluit. Etsi enim pro eâ animi mansuetudine, quæ e scriptis ejus passim elucet, hæreticos odio non persequeretur, nec ab eo ipse procul abesset, quin eorum numero adscriberetur, ecclesiæ tamen sanctæ definiendæ patrocinium suscepit eamque criteriis negativis et positivis ab aliis societatibus distinxit<sup>105</sup>); quorum illa in eo continentur, quod enumeratos notissimorum hæreticorum errores fugiendos asseruit; hæc in sanctitatis notione uberius explicatâ; sanctam vero ecclesiam idem ait significare ac ecclesiam Deo congregatam, in quâ nempe una sit fides et unum baptisma, quæ Deum patrem omnipotentem et unicum filium ejus Jesum Christum dominum nostrum, et Spiritum Sanctum concordî et consonâ substantiæ ratione profiteatur. Quæ quidem à Rufino recte monita sunt, quatenus illam perversionem eloquuntur, religionem Christianam Dei ritè colendi viam monstrare; hanc vero notam ecclesiæ distinctivam deinceps confundit cum ideali ecclesiæ statu eoque finc, ad quem tendere debet, cum per sanctam intelligi velit ecclesiam, quæ non habeat maculam aut rugam; apparet autem hanc ecclesiæ sanctæ descriptionem illâ longe latius patere, cum professio oris agendi rationem necessario non complectatur, et incertis viis vagari, omni inter theoretica

---

nus 80 hæreses commemoravit, at Philastrius Brixienis, Augustino teste, 156 cfr. Aug. epist. 222. p. 622. Nec usquam Epiphanius, de hæreticis agens, descriptionem illorum dedit.

<sup>105</sup>) Comment. in Symb. n. 39.

et practica criteria, idealem et realem ecclesiæ statum, discrimine sublato. Rectius utique Augustinus consummatam ecclesiæ perfectionem hac in vitâ contingere non posse, disertis verbis monuit<sup>106</sup>).

### § 23.

Quamvis autem Rufinus in sanctâ ecclesiâ describendâ, de statu ejus reali cogitasse videatur, nullam tamen harum notionum applicationem in ecclesiam catholicam fecit, de cujus auctoritate nec usquam fusius disputavit; quin immo ne uno quidem verbo peccata ab ecclesiâ remitti posse commemoravit, hanc potestatem ad solum Deum referens. Nonnullæ quidem operum Rufini editiones reperiuntur, quæ in expositione Symboli apostolici num. 39. vocem catholicam post sanctam ecclesiam habeant, sed nec in libris scriptis invenitur, nec eam Rufinus, qui nullam Symboli particulam sine explicatione reliquit, uno quidem verbo exposuit. Præterea in primævâ symboli formulâ hanc vocem non fuisse, indicare videtur Augustinus, qui in libro de Fide et Symbolo, primum dicit sanctam ecclesiam, deinde addit ipse: utique catholicam. Memoratu quoque dignum est, quod Rufinus præpositionem *in* ante sanctam ecclesiam ad divinas ab humanis rebus distingrendas, omissam esse retulit; quod discrimen, quo luculentius appareret, Græci recentiores, verbum *πιστευω* ante *την ἁγίαν ἐκκλησίαν* repetierunt. vide King. hist. Symb. Apost. p. 272. At locus, qui huc trahi potest, et quo aliquid verè catholicum de clero et ejus

---

<sup>106</sup>) August. Retractat. Lib. 1. cap. 7 et 19. Lib. 2 cap. 18.

imperio dixisse videtur, est in Historiâ illius ecclesiastica Lib. 1. cap. 2., ubi imperatorem Constantinum in concilio Nicæno tantam auctoritatem sacerdotibus tribuere facit, ut vel ipsos reges judicare valeant, ipsi vero ab hominibus judicari nequeant; et sane sensum imperatoris omnino pervertit, cujus verba, teste Sozomeno, longe alium sensum exhibent; minime quippe decere sacerdotes (rixari enim in concilio cæperant) sese tales præbere, ut ab hominibus judicandi essent; nec aliis causas et controversias ecclesiasticas, quam episcoporum judiciis submittendas esse.

#### § 24.

Venimus nunc ad eum fidei articulum, in quo Origenes quam maximè ab ecclesiâ catholicâ discrepasse creditur, ad carnis dico resurrectionem, quam, cum poenæ loco mortalibus adhæreret, in aëreum corpus abituram esse statuit. Patres vero alii ecclesiastici, cum animas non immortales esse censerent, nisi redditis e terræ sinu corporibus<sup>107)</sup>, identitatem carnis resurrectionis quocunque modo vindicare studebant; ideoque Hieronymus, gravissimus orthodoxiæ ecclesiasticæ vindex, vehementer Rufinum increpavit, quod hos Origenis pestiferos errores, libris *περὶ Ἀρχῶν* latius reddendis, in vulgus sparsisset; quo factum est, ut Rufinus ad symbolum aquilense se mox reciperet et in hoc articulo se ad fidem ecclesiasticam tantoperè accommodaret, ut non solum carnis, sed hujus etiam carnis resurrectionem concesserit; nec eo

---

<sup>107)</sup> cfr. Clausen De Platone p. 127. Tertull. lib. de animâ

contentus, naturam hujus carnis commemoraverit, ne membris quidem resurrecturis integritatem suam defuturam esse dicens<sup>108</sup>). Si hæc effata cum principiis doctrinæ Origenianæ comparantur, sane mireris, utraqve ex unius ejusdemque Rufini calamo proficisci potuisse, nec usquam alibi tantoperè fluctuasse videtur. Attamen rem accuratius intuiti mitius fortasse de illo judicabimus. Qui enim observavit, quam fideliter memoria eorum, quæ juveni traduntur, senem venerabunda comitari soleat, ei non erit miraculo, Rufinum, si vel ipsa persvasio mutata fuisset, in hoc dogmate exponendo, formulam Symboli Aquileiensis secutum esse; præterea ipse quoque Origenes resurrectionis doctrinam plurimis difficultatibus laborare concesserat<sup>109</sup>) et, secundum Versionem Rufini, aliquando de identitate corporum resurrecturorum loquutus fuerat, etsi hoc conditionaliter alioque sensu proposuerit<sup>110</sup>);

---

cap. 7. nihil enim (est anima) si non corpus.

<sup>108</sup>) Apol. Lib. 1. n. 6 et sqq. Comment. in Symb. n. 39 et 42. Apol. ad Anastas. n. 4.

<sup>109</sup>) Origen. c. Cels. Lib. 7. n. 32. p. 716. *Τὸν περὶ τῆς ἀναστάσεως λόγον πολὺν ὄντα καὶ δυσσεμνηνέυτον, καὶ δεόμενον σοφῆς, ὑπὲρ τι ἄλλο των δογματων, καὶ ἐπὶ πλεον διαβεβηκότος.*

<sup>110</sup>) περὶ Ἀρχῶν Lib. 2. c. 10 p. 101. verba versionis Rufinianæ hæc sunt: nam, si resurgunt corpora, sine dubio ad indumentum nostri resurgunt, et, si necesse est, nos esso in corporibus, sicut certè necesse est, non in aliis, quam in nostris corporibus esse debemus. Hæc verba nonnulli ita intellexerunt, ac si Origenes identitatem carnis resurrectionis docuisset, idemque e fragmentis librorum ejus De resurrectione, quæ supersunt, probare voluerunt, cum in iis plura reperiantur, quæ ad resurrectionem carnis

denique Rufinus, hanc quidem carnem resurrectionem esse contendit, sed purgatam et corruptionis expertem, immo — ut ipsius verbis utar — cui nihil omnino de omni naturâ suâ desit, nisi sola corruptio. Hæc vero effata inter se conciliari nullo modo possunt; caro enim fragilitatis notionem ubique involvit, ademptâque corruptione, non amplius caro est. Et certe plura sunt, quæ suspicionem moveant, Rufinum hæc de identitate carnis resurrectionis non tam persvasione, quam metu ductum pronuntiâsse, imprimis, quod hac de re agens, spirituales carnis istius

---

trahi possint. Sed quod locum citatum attinet, primum observandum est, græca et genuina Origenis verba non haberi, deinde, alius omnino est verbarum sensus, nec enim de identitate corporum loquitur, sed de corporibus nostris; quemcunque quippe in resurrectione corpus, sive indumentum (*organon*) uliquod, naturæ ipsius quam maximè congruum nacturum esse posuit, ita ut suum in eo corpus agnoscat, individualitatis suæ optimè respondens. Fragmenta vero ista librorum De resurrectione, quæ pro carnis resurrectionis identitate facere videntur, ex apologiâ Pamphili pro Origene desumpta sunt, qui cum Origenem u suspicionem hæreseos vindicare studeret, doctrinam ejus, quantum fieri putuit, ad fidem ecclesiasticam accumulavit ac simul peculiarem ejus indolem abstulit. Nec Origenem carnis resurrectionis identitatem, docuisse cum plurimi scriptorum ipsius loci ostendunt doctrinæque principia, tum etiam adversariorum, Methodii, Epiphani, Hieronymi, accusationes, qui cum doctrinam de mortuorum resurrectione omnino negâsse contenderunt. cfr. Epiph. adv. Hæres. L. 2. T. 1. p. 398. 533 et sqq.

naturam datâ operâ ubique inculcat, nec adeo suam de hoc dogmate fidem, sed multo magis harmoniam eorum, quæ ipsi in baptismo Aquileiæ suscepto tradita fuissent, et quæ à sede apostolicâ traderentur, commemorat<sup>111</sup>). Hanc meam de persuasione Rufini sententiam illud fortasse refutare videbitur, quod in fine Apologiæ ad Anastasium: Ego autem, inquit, præter hanc fidem, quam supra exposui, id est: quam ecclesia romana, et Alexandrina et Aquileiensis nostra tenet, quæque Hierosolymis prædicatur, aliam nec habui unquam, nec habebo etc. Sed observandum est, Rufinum supra indolem carnis resurrectionæ spirituales ita descripsisse, ut hanc salvâ conscientia persuasionem suam esse declarare potuisset, si corpus æreum fore credidisset; deinde etiam fidem suam in fine Apologiæ in universum commemorat, at in num. 5. in eos anathematis fulmen conjecit, qui diabolum æternis suppliciis plectendum esse negarent, nullâ hujus in articulo de carne resurrectionis mentione factâ; quare anathema in fine apologiæ positum, ad illos proximè pertinet, in quos supra applicatum fuerat, nec adeo ad aliter de resurrectione sentientes referendum est.

### § 25.

Quod poenas æternas attinet, ab Origenis sententiis se omnino alienum declaravit, statuens Diabolum et omnes impios æternis suppliciis esse plectendos<sup>112</sup>).

---

<sup>111</sup>) Apol. Lib. 2. n. 47 et Apol. ad Anast. n. 4.

<sup>112</sup>) Apolog. ad Anastas. num. 5.



## § 26.

De animarum origine varias varii patres antiqui sententias amplexi sunt. Origenes, ut supra dictum est, (§ 8) cum Pythagorâ philosopho Platonisque agens, qui de coelo lapsas putaverunt, animas corporibus antiquiores esse statuit; alii, ut Stoici, Manichæi Priscilianique sectatores e propriâ Dei substantiâ factas suspicabantur; alii, nominatim Tertullianus, Lactantius, Apollinaris et maxima pars occidentalium, per humani seminis tradncem animam quoque diffundi autumabant, ut, quemadmodum corpus e corpore, sic anima nasceretur ex animâ et simili cum brutis animantibus conditione subsisteret; alii, ut Hieronymus et Augustinus, Deum quotidie animas creare ac nascentibus quasi infundere dixerunt<sup>113)</sup>; quorum ille quosdam ecclesiasticos reperiri asseruit, qui animas in Dei thesauro aliquo haberi, olim conditas arbitrarentur<sup>114)</sup>. Nullam certam hac de quæstione sententiam Rufinus amplexus est, sed hoc unicè tenuit, Deum esse animarum et corporum creatorem<sup>115)</sup>; ei hic ea judicium Rufini sanitas laudanda est, quod hanc doctrinam, quam Hieronymus in re ecclesiasticâ maximi momenti esse judicavit<sup>116)</sup>, pro fidei articulo non habuit, et, quod ea sæpius, quæ ad fidem propriè non pertinere videret, quando de iis fidem pronuntiandam ecclesia postulabat, quam maximè potuit ad indolem biblicam revocavit, foroque disquisitionis re-

---

<sup>113)</sup> August. Epist. 166. Hieron. epist. 165.

<sup>114)</sup> l. Hieronymi citato.

<sup>115)</sup> Apol. ad Anastas. n. 5.

<sup>116)</sup> Hieron. l. c.

licto, usum eorum practicum indicare studuit. — Tripartitam animæ virtutem esse voluit, sive tres esse species motus ejus, per iram, per cupiditatem, per rationem<sup>117</sup>), cum philosophis agens, qui tres in animâ humanâ passionēs esse dixerunt, *Tὸ λογικὸν* (rationabile), *Tὸ θυμικὸν* (quod iræ respondet), *Tὸ ἐπιθυμητικὸν* (concupiscentia); quam tamen animæ divisionem Origenes à scripturâ sacrâ non valde confirmari asseruit<sup>118</sup>), aliiqve patres admittere recusarunt; dum enim Tertullianus, hac in re quasi fluctuans, varias philosophorum sententias enumerat<sup>119</sup>), Augustinus quatuor animi perturbationes, cupiditatem quippe, lætitiā, metum, tristitiā admisit<sup>120</sup>).

### § 27.

Sententias Rufini de animâ humanâ examinantibus, ea se nobis quæstio offert, quodnam ei cum dogmatibus Augustini et Pelagii commercium intercesserit et quo jure huic prælusisse dici possit? — Origenem in scriptis suis libertatem arbitrii humani ubiqve vindicasse supra in § 8 commemoratum est. Sed, cum culpam hac vitâ prius contractam admitteret, peccatum aliquod originale cum Augustino amplexus esse, primo quidem aspectu videri posset, si vero rem accuratius intuemur, ex hac ipsâ apparcute

117) De Benedict. Patriarch. Lib. 2. n. 3.

118) Orig. *περὶ Ἀρχῶν* Lib. 3. c. 4. n. 1. p. 146.

119) Tert. De animâ c. 14. Dividitur, autem, inquit, nunc in partes duas à Platone, nunc in tres à Zenone, nunc in quinque et in sex à Panætio, in septem a Sorano, etiam in octo penes Crysippum etc.

120) cfr. August. Confess. Lib. 10 c. 15.

similitudine, summa utriusque doctrinae diversitas ac dissimilitudo patebit; ideo quippe Origenes culpam animarum præexistentium docuit, quo ostenderet, quemcunque esse suae fortunæ fabrum, cui nec aliena culpa imputaretur, nec nisi ea, quæ aliquando ipse fecisset; pro suis enim actionibus omnes æquè judicari statuit, et, quod relationem de lapsu Adami attinet, ad describendam naturæ humanæ conditionem dictam putavit<sup>121</sup>). Quemadmodum autem de peccato Adami posteris imputando ne cogitavit quidem, sic etiam ἀναμάρτησιν hominis, strictiore, ut ita dicam, sensu, admisit; fatetur quippe, impossibile esse, hominem ab initio non peccare — verisimiliter ob mysterium natiuitatis cum præexistentiā animarum cohærens<sup>122</sup>); — eos tamen, etsi raros, reperiri, qui per verbum divinum conversi non amplius peccent; nam ad efficienda ea, quæ difficillima nobis et prope impossibilia videantur, voluntatem cum exercitatione conjunctam magni momenti esse statuit, hominesque, quando velint, pravitatem suam, quantalibet antea fuerit, vincere et virtutem in vivendo con-

121) Orig. c. Cels. L. 4. n. 40. p. 535.

καὶ γὰρ ἐν τῷ Ἀδὰμ (ὡς φησιν ὁ λόγος) πάντες ἀποθνήσκουσιν καὶ κατεδικασθησόμεν ἐν τῷ ὁμοιώματι τῆς παραβάσεως Ἀδὰμ. εἴχ' ἤτις περὶ ἑνὸς τέλους, ὡς περὶ ὅλων τῶ γενέσθαι ταῦτα φασχοῦτος τῷ θεῷ λογῶν, καὶ γὰρ ἐν τῇ των λεγομένων ὡς περὶ ἑνὸς ακολουθία ἡ ἀρα τῷ Ἀδὰμ πόλην πάντων ἐστίν.

122) Omnes loci scriptorum Origenis, e quibus doctrinam de peccato originali erui posse credideris, ex, gr. Tract. 9 in Matthæum et Homil. 14 in Lucam, de mysterio natiuitatis, cum præexistentiā animarum cohærente, explicandi sunt.

sectari posse<sup>123</sup>). Nec tamen gratiam divinam à piis conatibus adjuvandis exclusit<sup>124</sup>). Has ideas, quæ omnia Origenis scripta permeant, Rufinus ut interpret per occidentem propagavit; librum quoque Evagrii<sup>125</sup>) *περὶ ἀπαθείας* et Sexti<sup>126</sup>) sententias e græco in latinum sermonem transtulit, quorum illum æque ac Rufinum, quasi Origenis assecclas et præcursores Pelagii Hieronymus exagitavit, quippe qui hæresin Pythagoræ et Zenonis *ἀπαθείας* et

123) Orig. c. Cels. L. 3. n. 62. p. 448 et u. 69. p. 493.

124) — Lib. 3. n. 7. p. 494.

125) De Evagrii scriptis cfr. Gennadium de Scriptorib. ecclesiast. cap. 11. p. 85. Quæ Rufinus ex iis transtulit, hæc sunt: Liber centum sententiarum ad monachos, sive anachoretas: Liber de vitâ communi coenobitarum ad Synoditas, alias: Sententiæ de Apathiâ, ac Liber ad virgines Deo sacratas cfr. Vallars. p. 154 et 155.

126) Qvis ille Sextus, Xystus, Sextius, vel Sixtus fuerit — tot enim modis scribitur — doctorum inter se discrepant sententiæ; ipse quidem Rufinus in prologo Sententiarum Sexti, quas Aproniano inscripsit, eundem, qui in urbe Romanâ episcopi et martyris gloriâ decoratus fuisset, ab aliis tradi dixit; quare Hieronymus in mansu Rufini excanduit epist. 43 ad Ctesiphontem, quasi Sixti pontificis nomen scriptis ejus suspendisset; hoc etiam effecit, ut, cum Pelagius locos aliquot tanquam Xysti, romanæ ecclesiæ pontificis et martyris, pro se recitasset, Augustinus eos, bonâ fide ratus auctoris verè pontificis et martyris in sensum catholicum emollire conaretur in Libro De naturâ et Gratiâ c. Pelag. c. 64 § 77.; at postea in Lib. 2. Retract. c. 42 se auctore deceptum fatetur. Philosophum Pythagoricum fuisse, plerique putant

*ἀναμνηστικός* — quæ per impassibilitatem et impeccantiam explicat — Origeni olim propriam, in vulgus sparsissent <sup>127</sup>).

### § 28.

Si vero quæritur, quid his de rebus ipse Rufinus docuerit, quoniam ei nulla hinc orta cum Hieronymo fuit controversia, non nisi pauca, quæ quasi in prætereundo eloquutus est, effata hinc illinc colligenda sunt; sed horum quoque examinatio ostendit, quam invitus Origenis castra deseruerit; ubi quippe nulla dissimulandi necessitas instabat, pervasionem suam liberè pronuntiavit, quod imprimis e doctrinà de arbitrii humani libertate, quam et suis et aliorum maximè verbis vindicavit, conspicuum est. De peccato originali etsi nihil memoriæ proditum reliquerit, attamen, quam longè ab hoc dogmate, sensu Augustini amplectendo abfuerit, inde apparet, quod cum Origene aliisque doctoribus Alexandrinis inter imaginem ac similitudinem Dei discrimen fecit; statuens, imaginem Dei, ad quam homo creatus sit, dispositionem esse ad bonum ab ipso homine enucleandam, ut scientiâ operumque merito ad similitudinem Dei emergat<sup>128</sup>); quæ tamen bona opera

---

<sup>127</sup>) cfr. Hieron. Prolog. Lib. 4. in Jerem. et epist. ad Ctesiphont, ubi Evagrium docuisse contendit impassibilitatem et imperturbationem animi, ita ut nunquam ullo perturbationis vitio commoveatur, et vel saxum, vel Deus sit.

<sup>128</sup>) cfr. De Bened. Patriarch. Lib. 1. Bened. Judæ p. 15.

Quo melius appareat, quam avidè Rufinus sententias Origenis imbibcrit, quamvis eas ubiqvè palam proferre non ausus sit, adferre juvat locum Origenis e libris *περί*

sic non commemoravit, ac si illis homo aliquid per se mereret, cum ad gratiam Dei sint referenda, neque gestis, quæ mutari infectave reddi non possint, sed animo, quando de malo in bonum Deo auctore convertatur, remissio peccatorum impetranda sit<sup>129</sup>).

### § 29.

His paucis Rufini effatis — nec enim plura in scriptis ejus reperimus — cum tota illius agendi ratione et accusationibus Hieronymi (in § præced:) collatis, subjungi quoque possunt antiquorum scriptorum testimonia, licet aliis refragantibus eumque labe Pelagianâ absolvantibus. Notatu autem dignissimum est, quod Cælestius pelagianus, Rufinum presbyterum, qui fidem catholicam de traduce peccati inficiaretur, in judicio Carthaginiensi, quod anno 412 habitum est, sui purgandi causa nominavit; quæ acta Augustinus his verbis retulit<sup>130</sup>): Aurelius episcopus dixit: Sequentia recitentur. Et recitatum est, quod peccatum

---

Ἀρχὴν Lib. 3. c. 6. n. 2. p. 152, cum citatis Rufini effatis conferendum: hoc, ait, ergo, quod dixit, ad imaginem Dei fecit eum et de similitudine siluit, non aliud indicat, nisi quod imaginis dignitatem in primâ conditione percepit, similitudinis vero perfectio in consummatione servata est; scilicet, ut ipse sibi eam propriæ industriæ studiis ex Dei imitatione conscisceret, cum possibilitatem sibi perfectionis divinitus datam, per imaginis dignitatem in fine demum per operum expletionem perfectam sibi ipse similitudinem consummaret.

<sup>129</sup>) Comment. in Symb. n. 40.

<sup>130</sup>) August. de peccato origin. cap. 3.

Adæ ipsi soli obfuerit et non generi humano. Et cum recitatum esset, Cælestius dixit: Dixi de traduce peccati dubium me esse, ita tamen, ut cui donavit Deus gratiam peritiæ consentiam, quia diversa ab his audiui, qui utique in ecclesiâ catholicâ constituti sunt presbyteri. Paulinus diaconus dixit: dic nobis nomina ipsorum. Cælestius dixit: Sanctus presbyter Rufinus, Romæ qui mansit cum sancto Pammachio etc. Hinc factum est, ut, qui suspicionem hæreseos pelagianæ à Rufino nostro amoliri voluerint, ad conjecturas confugientes, de alio aliquo Rufino Cælestium loquutum esse putaverint; aut quippe de Rufino quodam Syro, aut de Rufino Hieronymi discipulo, qui e Bethleemitico secessu ab eodem per Romam Mediolanum missus est anno circiter 399; aut denique de Rufino Palæstinæ ecclesiæ episcopo.<sup>131)</sup> At hisce conjecturis opus esse non videtur; fatendum enim est, Rufinum nostrum, Origenis, Evagrii ac Sexti scriptis vertendis ac in vulgus per occidentem dispergendis, suum hac in re cogitandi tenorem satis luculenter prodidisse, paucaque ipsius, quæ huc pertinentia nobis reliquerit effata, magis certè cum Pelagii quam Augustini sentiis conspirare. Nec tamen statim inde sequitur, cum Pelagio prælusisse; siquidem subjectiva formalisque libertas à gratiâ divinâ, libertatis omnis principio, nimium divulsa, systematis Pelagiani cardinem efficit; quam in partem Rufinum peccasse, argumentis ex historiâ scriptisve illius petitis, probari non potest.

---

<sup>131)</sup> cfr. Mar. de Rubcis de monum. eccl. Aquil. p. 130.

## Sectio Quarta.

de Rufini polemicâ scribendi ratione cum Hieronymi collatâ, brevi addito cortaminis inter eos conspectu historico.

## § 30—35.

## § 30.

Quomodo Rufinus Origenem et interpretationem suam librorum *περι Ἀρχῶν* à criminationibus Hieronymi defendere conatus sit, in § 12 supra commemoratum est. Hoc non acquiescens Rufinus criminationes à se remotas in criminantem retorquere stnduit, ideoque in scripta ejus tam exegetica<sup>132)</sup>, quam dogmatica<sup>133)</sup>, censuram immitem exercuit, varias ex iis sententias decerpens, quas perperam vel incaute prolatas existimavit; quæ per singula eundo etsi longum foret, nec nostri sit instituti, gravissima tamen omnium accusatio, quam in Hieronymum coniecit, quæ vero ipsi à doctis maximè vitio vertitur<sup>134)</sup> silentio non pretereunda videtur, quod quippe Sacri codicis interpretationem Hieronymi latinam ex ebræo fonte deductam omnino improbavit<sup>135)</sup>; hoc vero, cum ex omnibus Hieronymi scriptis maximâ laude dignum esset, Rufino summæ ignominie cessit, quæ sinunquam omnino, aliquatenus tamen, diluipoterit, rebus, quibus ad criminandum incitatus accessit, consideratis. Hieronymus scilicet Rufinum, interpretandis *περι Ἀρχῶν* libris, id ausum esse doluerat, quod nemo

132) Maximè in Comment. Hieron. in Epist. Paulinas.

133) Quæ de resurrectione Hieron. docuerat.

134) cfr. Clausen de Augustino p. 78.

135) Apol. L. 2. n. 31 et sqq.



prudentium vel sanctorum in latinum vertere aggredi voluisset, et quod post quadringentos annos, simplices latinorum aures vocibus novæ doctrinæ pulsare cæpisset<sup>136</sup>); ad quæ Rufinus hunc in modum respondit; si interpretatio sua scriptorum Origenis damnanda et ob novitatem periculosa sit, quæ modo auctoritatem humanam attineat, quid tum statuendum esse de iis operibus, quæ divinam auctoritatem emendare adeoque labefactare videantur? et nominatim de Hieronymo, qui primus omnium omnes in hoc vires intenderit? si unius hominis effata à fide catholica fortasse divergentia imbecilles offendere possint, quid statuendum esse illos putare de studiis in corrigendum sacrum codicem collatis, quem divinitus inspiratum esse tota ecclesia credat? rem igitur e primo aspectu non statim esse condemnandam, aut — ut ipsius utar verbis — non esse temerè de alterius opere judicandum<sup>137</sup>). Ex istà igitur laboris Hieronymiani reprehensione, cum in suspectis utriusque inter se comparandis unice versetur, non tam rei ipsius carpendæ, quam sui purgandi consilium eminet. Huc accedit, quod, si ea Rufino vitio vertenda est, quam calore disputandi abreptus Hieronymo intulit, quid tum de Augustino dicemus, qui nullà re nisi solâ persvasione adductus, hoc Hieronymi opus vituperare non dubitavit, laboremque ejus in vetere Testamento de ebræo vertendo collocatum, non inutilem modo, sed detrimenti etiam et periculi plenum esse declaravit<sup>138</sup>). Ceterum

<sup>136</sup>) Hieron. Epist. ad Pammach. cfr. Ruf. Apol. L. 1. n. 36 et Lib. 2. n. 31 et seqq.

<sup>137</sup>) Apolog. Lib. 2. n. 38.

<sup>138</sup>) August. Epist. 28. num. 2.

de hac, ut plerisque criminationibus, Hieronymo à Rufino illatis, id valet, quod non tam veritatis vindicandæ, quam suspicionis hæreseos ab ipso amoliendæ studium arguunt; id enim ubique ostendere conatur, Hieronymum, et Origenis operibus antea laudandis, et discrepantes à fide ecclesiasticâ sententias eloquendo, nec ipsum sibi constare, nec minorem, quam cuius nunc accusabatur, culpam sibi contraxisse, ita ut, si orthodoxia e constanti fidei ecclesiasticæ professione ponderanda esset, Hieronymus non majore jure, quam ipse, ad hoc nomen adspirare posset.

### § 31.

Hæc hactenus de apologiis Rufini et criminationibus Hieronymo ingestis, quas hic duobus adversus illum invectivarum libris diluens, cum à Rufino brevem epistolam extorsisset, tertium librum addidit. Restat, ut inter certantes comparatio paucis instituat. In id certè omne studium contulerunt, ut unus alterum ad incitas redigeret et aliquam fluctuantem ac à fide ecclesiasticâ, dissentientem cogitandi agendive rationem in hoste accusandam reperirent, de eo non tam solliciti, quod verum esset, quam quod causæ interesset verum videri; ideoque sensum ac verba pro lubitu detorquere et in usus suos vertere, nec non, quæ alioquin certè non improbassent, vituperare haud dubitârunt, ita ut pro firmis et perspicuis argumentis, ingenii sæpè lusus, turbida et jejuna ratiocinia subtilesque disputandi argutias habeamus. Veruntamen in hoc inter se differunt, quod Hieronymus mirâ convitiis mole Rufinum obruit et omnis generis opprobria injuriæ

odiiqve plena in eum conjecit<sup>139)</sup> quorum etsi Rufinus singulis singula opponens, suam quoque disputandi rationem aculeis munierit, à conviciis tamen gravioribus abstinnit, ejus generis odiosas contumelias, homini christiano indignas, se, ut potè concordiae pacisque amantem, detestari contendens, nec nisi durà sui purgandi necessitate coactum, ad scribendum contra Hieronymum accessisse<sup>140)</sup>. Placabilem quoque Rufinum et ad discordiam istam componendam proclivem fuisse, argumentis historicis affirmare licet; nam, cum Cromatius episcopus Aquileiensis, utrique amicus, dolens, eos, rupto foedere, quod per tot annos amore conjunctos tenuerat, in dissidia ruere, studium ejus alio convertere vellet, Evsebilique historiam græcam in latinum vertere svaderet, Rufinus mox paruit et ad hoc munus absolvendum sese convertit<sup>141)</sup>.

### § 32.

Mirum igitur, cum e scriptis Rufini polemicis mitius et humanius ingenium eluceat, tot antiqui ævi scriptores, qui certaminis hujus mentionem fecerint, omnem in eum culpam conjecisse, verbaque Hieronymi tantum valuisse, ut vel recentioris ætatis auctores iniqua de illo ferant judicia. Sed animadvertendum est, Rufinum, quando adversus Hieronymum scribendi munus suscepit, non

---

<sup>139)</sup> cfr. Hieron. Apol. 1. adv. Ruf. p. 488. Engelstoft: de Hieronymo p. 145 varia convicia, quibus Rufinum Hieronymus petiit, in unum congescit.

<sup>140)</sup> Ruf. Apol. Lib. 1. num. 2. Lib. 2. n. 13.

<sup>141)</sup> vide præfat. Ruf. in Hist. ecclesiast.

modo contra eum, sed etiam contra ingenium ævi sui, Origeni infestum, pugnasse. Hieronymus enim propter orthodoxiæ vitæque asceticæ ardorem, quo plerique flagrabant, tantum sibi nomen peperit, tantæque doctrinæ ac sanctitatis laude floruit, ut, quod laudaret, laudandum, quod vituperaret, vituperandum esse crederetur et posteriores multi in verba magistri jurantes in Rufinum injurii esse non dubitarent. — Ut egregium ejus exemplum, quod vituperatio Rufini, non argumentis e scriptis illius petitis, sed aliorum auctoritate et verbis, quasi per manus traditis, haud raro nitatur, adferre juvat locum quendam e Cuykii annotationibus ad Cassiani opera, De incarnatione Domini, edita Lips. 1733 in fol., ubi. pag. 803, Cuykiius ad refutandam laudem, Rufino à Gennadio Massiliensi, in libro De Scriptor. Ecclesiast. cap. 17 p. 92. attributam, Gelasii pontificis decretum in concilio Romano LXX episcoporum attulit, quod tale est: Ruffinus vir religiosus, plurimos ecclesiastici operis edidit libros, nonnullas etiam scripturas interpretatus est, sed quoniam beatus Hieronymus in aliquibus eum de arbitrii libertate notavit, illa sentimus, quæ prædictum beatum Hieronymum sentire cognoscimus. Et non solum de Ruffino, sed etiam de universis, quos vir Sæpius memoratus zelo Dei et fidei religione reprehendit. Cui decreto innixus Cuykiius Rufini laudem his verbis improbat: eat nunc Gennadius et Ruffinum cum D. Hieronymo conferat, aut, quod impudentius est, ei præferat. Absit vero, ut, suum Rufino tribuentes, Hieronymum meritâ laude defraudari velimus; doctrina enim in eo absque dubio

major et copiosior fuit, sed amorem et humanitatem in eo desideramus.

### § 33.

Ex iis, quæ supra de certamine inter Rufinum et Hieronymum dicta sunt, puto apparere, quam iniqui Rufini sint arbitri, qui æmulatione ductum in Hieronymum invasisse contendunt<sup>142)</sup>; cum durâ sui et Origenis defendendi necessitate coactus ad scribendas apologias accesserit<sup>143)</sup>, nec alienæ gloriæ invidus, id ægrè ferret, quod Hieronymus majore doctrinæ laude floureret, sed, quod ipsum invidiosis accusationibus obruisset<sup>144)</sup>; quid quod, in ipso certaminis fervore, suam Hieronymianâ versionem operum Origenis incultiore sermone conscriptam esse concessit<sup>145)</sup>, nec non ubique de doctrinâ suâ modeste loquitur, quantum in hoc ab Hieronymo dissimilis, qui

142) cfr. M. Anton. Sabellici Lib. 6 Exempl. c. 9. quid quod, inquit, ne Hieronymo quidem, in quo tantum infusi luminis fuit, tantum eloquentiæ, suus defuit æmulus. Sed potuit Rufinus verbis contendere, sanctitate non potuit, quanquam, si illud quoque in ambobus pensetur, tantum stridonensis illa tuba carniciæ præstitit, quantum Indici elephantis barritus culicis bombitulo.

143) Rectius Apologiæ quam Invectivæ vocantur; etsi enim in Hieronymum invehantur, id tamen unicè ngunt, ut criminationes auctori illatas diluant, partim refutando, partim in criminantem retorquendo; debet igitur ab apologetica, potiore illarum parte, denominatio fieri.

144) Apol. Lib. 2, n. 40.

145) I. c. n. 29.

invidas aliorum voces, non sine multâ sui admiratione repulit<sup>146</sup>).

### § 34.

Nec Hieronymus criminationibus Rufino illatis acquievit, verum etiam duos priores invectivarum suarum libros ad Augustinum episcopum Hipponensem, virum suæ ætatis celeberrimum, misit, quo eum Rufino infestum redderet; tantum vero abfuit, ut Augustinus in partes Hieronymi descenderet, ut legentem ejus in Rufinum invectivas dolore se contabuisse et timore obriguisset declararet, eumque per litteras amoris ac modestiæ plenissimas ad concordiæ studium hortaretur; dolere se enim inter tantos viros et olim tam amicos dissidii flammam ardere<sup>147</sup>); quæ Augustini æquitas tanto magis laudanda est, quod ipse Hieronymo auctor fuerat, ut ea Origenis errata revelaret, quibus à fide veritatis recessisse vinceretur<sup>148</sup>).

### § 35.

Hæc tamen Augustini humanitatis vestigia premere alii recusarunt. Jamdix quippe in oriente, quæstione adversus Origenis doctrinam motâ<sup>149</sup>), damnationem ejus Theophilus Alexandrinus, sibi ab Origenianis injuriam nescio quam illatam ægrè ferens et minis andropomor-

---

146) cfr. Engelstoft De Hieron. p. 67. et Hieron. Præfation. in L. 1. Comment. in Ephes.

147) Aug. epist. 63.

148) Ejusd. epist. 40. n. 9.

149) vide, quæ de Epiphanio supra passim dicta sunt, § 6. § 12. § 17. § 24. not. 110.

phitarum territus, vehementer postulavit, eademque Romæ causa agitabatur, cui latina librorum *περὶ Ἀρχῶν* versio, quam Rufinus confecerat, ansam dedit, ipseque interpres in crimen Romam vocatus est, qui, cum præsens causam suam dicere recusaret, apologiam pro fide suâ ad Anastasium episcopum Romanum misit, ut Invidiam sibi apud eum conflatam dilueret. Interea Anastasius fidelibus libris Origenis interdixerat ejusque dogmata proscripserat, de quâ re Johannes episcopus Hierosolymitanus certior factus, per epistolam Anastasium consuluit, num Rufinus, ob versos e græco in latinum sermonem Origenis libros, eodem crimine plectendus esset; cui Anastasius, causam Rufini ab Origenis causâ distingvendam esse respondit, illamque divino judicio reservavit, cum culpa ejus ex eo penderet, quo consilio, nemini præter Deum noto, Origenis libros latine vertisset; cum vero damnationis evitandæ legem attulit, ut Rufinus Origenis dogmata exsecraretur. Nec tamen Rufinum hæc ejurasse, nec unquam ut hæreticum publicè damnatum esse, dubiis omnibus exemptum est. Exstat quidem sub ejus nomine Palinodiæ libellus, quem e bibliothecâ Vaticanâ depromptum, primus protulit Henricus Norisius (Hist. Pelag. Lib. 1. cap. 3), quo Rufinus errores, partim assertos, partim sibi imputatos ejurat. Hunc vero librum à Rufino non esse scriptum, si non aliunde, inde tamen pateret, quod initium eum non Romæ sed Hierosolymis et Bethleem prodiisse declarat, quo Rufinus, in Italiam semel reversus, nunquam venit, in Siciliâ apud Messanam vitâ defunctus. Huc accedit, quod Hieronymus Rufino certè librum istum exprobrasset, si auctor ejus fuisset.

Nec defuerunt, qui peremptoriam anathematis sententiam ab Anastasio episcopo in Rufinum latam censuerint, ad quod probandum locum quendam Hieronymi attulerunt, nempe Invect. in Ruf. L. 3. n. 15; ubi Hieronymus: quomodo, inquit, suscepit Italia, quod Roma contempsit? Episcopi suscepert, quod sedes apostolica condemnavit? Hæc profert nimirum de apologiâ, quam Anastasio Rufinus miserat. Verum, si Anastasius in epistolâ suâ ad Johannem episcopum nullam apologiæ mentionem fecerit, inde non sequitur, eam contempsisse, aut Rufinum damnasse. Præterea hæc opinio eo refellitur, quod in litteris Theophili pascalibus, ad Anastasium anno 401 scriptis, errores Origenis explicantibus, nulla Rufini mentio facta est; deinde, quod Anastasius, ne in privatâ quidem ad Johannem epistolâ Rufinum damnavit, sed iudicium de illo suspendens, factam ab eo in ejus conscientiæ consilium interpretationem transfert; denique quod Rufinus postea à præcipuis Italiæ episcopis in communionem suam benigne receptus est.

---

## Sectio Qvinta.

De Rufino interprete Sacræ Scripturæ et historico.

### § 36—42.

#### § 36.

A dogmaticis et polemicis Rufini scriptis <sup>150)</sup>, ad exegetica historicaque commemoranda pergimus. Ex

---

<sup>150)</sup> Habetur etiam sub nomine Rufini alia fidei expositio (vide Edit. Vallarsii p. 581 et sqq.), quam Vallarsius.



quo hæretici, imprimis Gnostici et Manichæi, infesta in religionem christianam tela conjicere et, non solum unam alteramve doctrinam aggredi, verum etiam ipsa doctrinæ fundamenta convellere, auctoritatemque sacrorum librorum, quibus illæ muniebantur, frangere cœperunt, ecclesiæ doctores, nominatim Origenes et Evsebius, necessitate quadam coacti, in traditionibus historicis à primis inde initiis repetendis et singulis earum testimoniis ponderandis occupati tenebantur, quo librorum genuinorum authentiam vindicarent, fictitios autem ex ecclesiâ dejicerent<sup>151</sup>). Hoc etiam Rufinus in exponendo symbolo non prætermittendum esse ratus, scripturarum sacrarum volumina enumeravit, easque in duas classes distribuit, canonicos quippe et ecclesiasticos libros, ita dispositos:

### Classis I.

#### Libri Canonici.

#### A. Veteris Testamenti:

Qvinque libri Mosis: Genesis, Exodus, Leviticus, Numeri, Deuteronomium.

---

argumentis externis et maximè internis adductis, Rufino auctori abjudicandam esse jure merito statuit, quibus cum nihil addere valeam, locum indicare sufficiat efr. Vallars. De vitâ Rufini pag. 234 etc.

<sup>151</sup>) Certe ante Evsebius librorum genuinorum Novi Testamenti catalogi facti sunt, efr. Hug. Einl. in die Schr. des N. T. Edit. 2. T. 1. p. 109. et sqq. — Discrimen, quod inter varias antiquissimorum librorum classes Evsebius fecit, satis notum est efr. Hist. Evseb. Lib. 3. c. 25. ubi tres classes potissimum respiciendæ sunt, *ὁμολογούμενοι*, *ἀπιλόγοι* sive *ρόθων*, et *ἀπορων καὶ δυσσεβῶν*.

Jesus Nave.

Judicum unacum Ruth.

Qvatuor Libri Regnorum.

Paralipomenon, qvi etiam Liber dierum dicitur.

Duo libri Esræ.

Esther.

Esaias.

Jeremias.

Ezechiel.

Daniel.

Duodecim prophetarum liber unus.

Job.

Psalmi David.

Proverbia.

Ecclesiastes. } Salomonis.

Cantica Canticorum. }

#### B. Novi Testamenti:

Qvatuor Evangelia; Matthæi, Marci, Lucæ, & Johannis.

Lucæ actus Apostolorum.

Qvatuordecim Pauli epistolæ.

Duæ Petri epistolæ.

una Jacobi.

una Judæ.

Tres Johannis.

Apocalypsis Johannis.

#### Classis Secunda.

##### Libri Ecclesiastici.

#### A. Veteris Testamenti:

Sapientia Salomonis.

Sapientia Sirach, sive: Ecclesiasticus.

Tobias. Judith.

Machabæorum libri.

## B. Novi Testamenti.

Libellus, qvi dicitur Pastoris, sive Hermæ.

Duæ viæ, vel: Judicium Petri.

In hoc librorum indice plura attentione digua sunt: primum, qvòd libros Threnorum et Baruchi prætermisit, et in libris Samuelis et Regum, uno nomine qvatuor Regnorum comprehensis, à dispositione versionis LXX discessit; deinde, qvòd libros, nullâ accuratiore, inter legem, prophetica, historica ac pœtica scripta distinctione factâ, nullâqve trilogiæ inter Judæos receptæ, תנ"ך (νομος) ספרים (προφηται̃ sive scriptores historici et prophetæ) ספרים (ὑμνοί, ἀγίόγραφα, τα ἄλλα βιβλία) ratione habitâ, omnes uno tenore recitavit; tum, qvòd numerum librorum Machabæorum non designavit; modo autem duos enumerare voluisse, vero simile est, cum tertius Machabæorum liber neqve in versionem vulgatam receptus sit, nec ab ullo ecclesiæ latinæ patre in canonem adscitus; deniqve, qvòd libris canonicis et ecclesiasticis recitatis, paullo post apocryphorum etiam mentionem fecit, et, in his tribus classibus à se invicem separandis, eam diligentiam adhibuit, ut canonicos libros esse dicat eos, e quibus fidei norma elicienda sit, ecclesiasticos, qvi in ecclesiis qvîdem legi solerent, non tamen proferrentur ad auctoritatem ex iis fidei comparandam; apocryphos, qvos in ecclesiis legere majores noluisent. — Qvam vero auctoritatem in disponendis Sacri codicis libris secutus sit, non liquet, cum pro more parum accurate e monumentis patrum se scrip-

turas designandi regulam hausisse contendat. Etsi autem Rufinus in libris canonicis à non-canonicis diligenter distingvendis et cum antiquioribus et cum Hieronymo<sup>152)</sup> consentiret, nihilo tamen minus ævo ipso Rufini libri Veteris Testamenti ecclesiastici conciliorum decretis<sup>153)</sup> in canonem recepti sunt, præeunte Augustino, qvi primus ordine codicis hebræorum relicto, apocryphis, qvi apud ipsum ecclesiasticos quoque libros comprehendunt, in sacrum codicem erectis, eandem, quam ceteris, auctoritatem divinam adscripsit<sup>154)</sup>. Id enim seculi istius ingenio convenit, ut, pro rationibus criticis et historicis, singulorum hominum auctoritatem ecclesia substitueret, qvippe quæ e sinu suo credendorum normam pro Iubitu depromptam aliis obtrudere jam coepisset.

### § .37

De modo, qvo sacra scriptura auctoribus divinitus inspirata sit, nil certi statuisset, nec ullam hac in re theoriam Rufinus secutus esse videtur<sup>155)</sup>; hoc unicè mirum est,

<sup>152)</sup> Hieron. Prolog. Galat.

<sup>153)</sup> concil. Carthag. 3. can. 47. conc. Hipp. c. 36.

<sup>154)</sup> cfr. Clausen de August. p. 45.

<sup>155)</sup> Hunc de inspiratione articulum, effatis Rufini dogmaticis subjunxissem, nisi tam paucis illum attigisset, ut ad fidem ejus illustrandam parum conferant; ea tamen omnino prætereunda non putavi, siquidem, cum diverso sacris libris pretio attributo collata, fluctuantem, nec sibi constantem, auctoris hac de re cogitandi tenorem exhibent.

quod, cum discrimen inter pretium librorum fecerit, inspirationis tamen, quam Spiritui Sancto adscribit, gradus nullos agnoscat, sed eandem ad omnes Veteris ac Novi Testamenti libros extendat<sup>156</sup>): et hac in re ab Origene discedit, qui relativam quandam, ut ita dicam, Veteris Testamenti inspirationem, adventu demum Christi probatam admisit. Sed observandum est, Rufinum hac de re modo generaliter esse locutum, magisque fidem ecclesiæ traditionibus majorum superstructam, quam persvasionem suam exposuisse<sup>157</sup>).

### § 38.

Cum Rufinus in monasterio Pineti libris Origenis περὶ Ἀρχῶν in sermonem latinum vertendis operam daret, interpretationis sacri codicis specimen aliquod edidit, rogatu Pontii Paulini cognomine Nolani, duos de Benedictionibus 12 patriarcharum libros conficiens<sup>158</sup>), qui, cum alia proprio Marte opera exegetica non scripserit, attentione nostrâ digni sunt<sup>159</sup>).

---

<sup>156</sup>) Comment. in Symb. n. 36.

<sup>157</sup>) Origen. περὶ Ἀρχῶν Lib. 4. n. 6. p. 161.

<sup>158</sup>) vid Præfation. in Lib. 1.

<sup>159</sup>) E græco Rufinum multa ad exegesis Sacri codicis pertinentia in sermonem latinum transtulisse constat, ita e scriptis Origenis: homilias 17 in genesin, 13 in Exodum 16 in Leviticum, 28 in Numeros, 26 in Josuam, 9 in Judices, 9 in Psalmos, 1 in librum 1 Regum, 4 in Cantica Canticorum, tomus 15, in 10 libros distinctos, in Epistolam Pauli ad Romanos. E scriptis Gregorii Nazianzeni: De dictis Jeremiæ. Multæ præterea versiones ci

## § 39.

Sacræ Scripturæ interpreti haud mediocris difficultas offertur, quando ea, quæ sensu litterali, ab iis, quæ sensu figurato et improprio dicta sunt, distingvi debent; periculum enim est, ne, si ad literas omnia resecantur, involucra idearum pro ipsis ideis amplectamur, et, ab altera parte, si litteræ negliguntur, interpretatio incertis viis vagetur; hujus utriusque rei antiqua ecclesia nobis exempla præbet, Alexandrinorum, qui in interpretando phantasie nimis indulgebant, et Manichæorum, qui, quo loca in Sacra scripturâ sibi invicem repugnantia invenirent, litteras miserè torquebant; illos Origens sequutus, scripturam triplicem sensum, litteralem quippe, moralem ac mysticum seu allegoricum continere statuit, credendumque esse, e visibilibus et invisibilibus cam, veluti e corpore quodam, animâ spirituque constare<sup>160</sup>); monens, scripturam, litterali sensu acceptam, multos in ruinam et præcipitium errorum traxisse<sup>161</sup>); quin immo, si ad litteras omnia urgerentur, impossibilia quædam et rationi repugnantia complecti tam Veteris quam Novi Testamenti libros<sup>162</sup>).

---

perperam tribuuntur ex. c. versio Origenis homiliarum in Lucam, quæ Hieronymum interpretem habent: comment. in 75 priores Davidis psalmos, in Oseam, Johelem, Amos. Utrum vero Origenis homilias 7 in Matthæum et 1 in Johannem verterit, in medio à doctis relinquitur.

160) Homil. 5. in Levit. n. 1. *Περὶ Ἀρχῶν* Lib. 4. n. 11. p. 168.

161) *περὶ Ἀρχῶν* L. 4. n. 8. p. 164 et 165.

162) *περὶ Ἀρχῶν* L. 4. n. 15. et 16. p. 173 ss.

Cum vero patres ecclesiæ eandem ad omnes sacri codicis libros auctoritatem divinam extenderent, nulloque inter diversum diversorum scriptorum argumentum discrimine facto, omnia, quæ de religione, historiâ, poësi, civitate perhiberent, eadem veneratione prosequerentur — at ex alterâ parte multa hic sibi invicem contraria deprehenderent, quo pietati consuleretur, ad allegoricum interpretandi principium mox confugerunt, per quod omnia explauare conciliareque potuerunt. Hinc autem factum est, ut plerique, donec ipsa ecclesiæ potestas pro interpretandi normâ haberi cæpta est, litteralem sensum satis non curarent, nec id tam spectarent, quod sacri scriptores dixerint, quam quod dicere debuissent; relicto autem sensu et consilio scribentis, litterisque in figuras imaginum mutatis, omnia lusibus et argutiis artificiosis replentur. In hanc partem Rufinum quoque peccasse, mystico Origenis interpretandi generi addictum, documento est, quod nobis reliquit, interpretationis suæ specimen. Etsi enim alterno intellectu expositionem dirigendam esse statuerit, ita ut interruptio historialis intelligentiæ mystici sensus arcanum proderet, nec tamen, ubi, et quomodo hoc principium hermeneuticum applicandum sit, nec certa veræ interpretationis criteria accuratius commemoravit, et in eo ipse totus est, ut nobiliorem — quem vocat — sensum e mysticâ rerum expositione provocet; hanc enim tanti fecit provinciam, ut, quo quis ei ritè fungatur, mentem Spiritu Sancto illuminatam deposci contenderit; quod, si de piâ mente ad fidem enucleandam necessariâ, interpretari liceret, rectè utique monuisset; verum hæc mystica Rufini rerum expositio, sunt lusus et excursiones allegoricæ,

quibus tantoperè delectatur, ut omnia ferè patriarchæ verba in Christum et res christianas detorqueat, nullàque contextus habita ratione, varios ex Vetere ac Novo Testamento locos undique congestos applicet et in usus suos trahat. Ad quam rem probandam pauca adferamus exempla:

in Libro 2<sup>o</sup> Benedict. Zabulon.

Vocabulum Sidon, quod venatorem vel venatricem explicat, de apostolis Christi accipiendum esse dicit, de quibus propheta prædixit: quia mittam venatores multos et venabuntur eos in omni monte.

Benedict. Isaschar.

Isaschar, quia merces interpretetur, illorum figuram servare dicit, qui dicunt: si enim volens prædicavero, mercedem habeo. 1 Cor. 9. et de quibus dictum est: ecce Domini filii merces, fructus ventris; monet nimirum mercedem filii Dei, apostolos rectè putandos esse, ipsos enim esse, qui concupierint bonum, de quorum animabus in Canticis Canticorum c. 1. dicatur: adolescentulæ dilexerunt te et quæ dicant ad Jesum; post te in odorem unguentorum tuorum curremus.

Benedict. Gad. Piraterium (πείρατήριον) tentabit illum, ipse autem tentabit eos post pedes; hæc verba veriore spiritualique intelligentiâ monet indicare illud Domini nostri et Salvatoris, quod adversus Diabolum habuit, positus in carne, certamen. Personam Christi ponit in Gad, in piraterio cohortem quandam et conspirationem Piratarum, æ: diabolum cum ministris suis et satellitibus.

Bened. Aser.

Quoniam Aser: beatus explicetur, hoc vocabulum



sensu mystico ad eum trahit, quem ab errore per pœnitentiam revocatum, paulatim per singulos gradus, usque ad beatitudinis nunc incrementa perducimus, post conversionem, post intelligentiam spiritualem, post tentationum victoriam.

Benedict. Neptholim.

Hanc ad Apostolos Christi transfert.

Bened. Joseph.

Josephum ad personam Christi revocat; quemadmodum enim Joseph, posteaquam putatus est mortuus, non solum vivens, sed etiam in regno positus invenitur, ita etiam Christus, qui apud Judæos mortuus putabatur, in cordibus fidelium et vivens invenitur et regnans; quam inter Christum et Josephum mysticam similitudinem sequentibus in omnes partes explicat.

Benedict. Benjamin.

his, quæ de Paulo Apostolo hic dicta esse, Origenes homil. 4ta in Ezechielem, Tertullianus contra Marcionem Lib. 5. c. 1., nec non Ambrosius in hunc locum, asseruerunt, Rufinus nonnulla addidit; quod quippe Benjamin sorte hæreditatis eum locum accepit, in quo terrena Jerusalem, typum habens et formam cælestis illius Jerusalem, collocata est etc., inde concludit, Benjamin pro Israele accipi posse.

Sed vereor, ne his inutilibus et nauseam fere moventibus verborum lusibus, diutius, quam par est, colligendis immorer; sufficiant igitur hæc allata mysticæ Rufini interpretationis exempla, quorum plura videndi cupidum ad auctorem ipsum ablegare liceat, eadem enim omnia effrenatâ nullisque regulis adscriptâ interpretandi licentiâ

lasciunt. Nec tamen Rufinus in litterali mysticoque explicandi genere substitit, sed — cum Scriptura divina non solum sacramentorum debeat scientiam continere, verum etiam vitæ dirigendæ normam — sensum quoque moralem e singulis benedictionibus mirâ arte provocat, comprehensâ quâcunque notionum et vocabulorum similitudine, cui rei affirmandæ hæc exempli loco inservire possunt: in Bened. Isaschar, verba Rufini ipsius ita audiunt: „Sed quoniam instituimus arcam Scripturæ divinæ, non bicameratam solum, sed tricameratam (sicut ad Noe à Domino dictum est) construere, videamus nunc, qualiter nobis Isaschar etiam tertium ædificet nidum. In superioribus adsumsimus eum hominem, qui tripartito animæ motu (ut est totius animæ langvor) ira et furore errantem, quod per concupiscentiam Ruben, et per iram Symeon et Levi prudentiam non rectè directam significari posse distinximus, sed hunc jam in Judâ ostendimus pœnitentem, et in Zabulon ex multâ parte conversum, in Isaschar vero, qui merces interpretatur, jam videmus eum etiam mercedem boni operis expectantem“ etc. Hic ideo ipsum loquentem induximus, quod his verbis argumentum morale plurium simul benedictionum, in compendium quoddam redactum, comprehendit. At non solum e nominibus patriarcharum, verum e singulis quoque uniuscujusque versus verbis moralem sensum elicit. Ne vero putemus, Rufinum solum tam ineptè interpretis munere functum esse ideoque nimis severè de illo judicemus, necesse est, eum cum ætate suâ comparemus, et tunc, ut antea dictum est, hoc plerisque patribus commune fuit vitium, quod in sensu mystico ubique inveniendo desudabant, unde ingentem mysteriorum,

imaginum, allegoriarum cohortem produxerunt<sup>164</sup>). Augustinus quidem mediam quandam inter verbalem et allegoricam interpretandi rationem, viam tenere conatus est, certasque regulas constituit, e quibus figurata sacrorum librorum dictio dijudicanda esset<sup>165</sup>); cum vero idem omnibus libris Veteris ac Novi Testamenti, idemque diversissimo singulorum argumento pretium tribueret, nec non in Manichæorum ad verba quæcunque prementium erroribus evitandis et impugnandis versaretur, non mirum, si in applicandis regulis suis ad Allegoristas plus justo accesserit. In exponendis benedictionibus patriarcharum, textum Versionis Lxx Rufinus sequutus est, lingvæ enim hebraicæ imperitus fuisse videtur; quod non mirabitur, qui perpendat, excepto Hieronymo, complures alios patres, et vel ipsum Augustinum, hujus lingvæ præsidio destitutos fuisse.

#### § 40.

Si hos Rufini De Benedictionibus Patriarcharum libros, cum decimaseptimâ Origenis in Genesin homiliâ compa-

---

164) Ita Ambrosius, his verbis: quis suscitabit illum? unius naturæ filium Dei cum patre esse, doceri affirmat. In Benedictione Simcon et Levi, Ambros. per hos duos filios Jacobi, scribas et pharisæos, qui in Domini passione nequitiam suam perfecerant, intelligi voluit et in câ re cum Rufino consentit. In Benedictione Dan, ejus judicis provinciam Rufinus ad Christum vivorum et mortuorum judicem, trahit, Ambros. de antichristo explicandum esse censet. etc.

165) cfr. Clausen de Augustino p. 150. et seqq.

ramus, tanta est inter utrumque, non solum sententiarum explicandique regularum, sed singulorum quoque verborum similitudo, ut dubitari vix possit, illos conficienti hanc ad manus fuisse; quæ res cum nesciam an ab ullo observata sit, aliquot utriusque commentarii locos inter se conferendos, ad sententiam nostram probandam, in medium proferamus. Cum commemorata Origenis homilia non nisi benedictionem Ruben, Symeon, Levi ac Judæ complectatur, ceteras octo, Rufino proprias, cum iis conferri non posse, per se patet. Interca diversitas quædam in dispositione benedictionum apud utrumque primum observanda est; dum nimirum Origenes à benedictione Ruben, ut filii Jacobi natu maximi, Rufinus à Judâ benedicendo incipit; verum hoc discrimen inde oritur, quod presbyter Paulinus Rufinum rogaverat, ut Genes. 49 versum undecimum, qui de benedictione Judæ agit, sibi explicare dignaretur, ideoque Rufinus priore libro hunc versum interpretatus, de undecim reliquis benedictionibus, rogatu ejusdem Paulini, secundum librum postea composuit. Sed ad comparisonem inter utrumque Commentarium instituendam revertamur:

**Benedictio Ruben.** Interpretatio Rufini: Incesti historia neminem latet, quomodo Ruben in concubinam patris sui efferbuerit flammâ libidinis et paternum maculaverit thorum. Sed quod in initiis laudis ei videtur aliquid adscribere, dicens: tu virtus mea, idcirco fit, ut gravius notetur in crimine, qui cum virtus patris haberetur et initium filiorum, nesciit servare reverentiam patri; quale est et illud, quod dicitur per prophetam: Ego te plantavi vineam

frugiferam, totam feracem, quomodo conversa es in amaritudinem vitis alienæ.

Interpretatio Origenis:

Incestus historia neminem latet, quomodo Ruben in concubinam patris efferbuerit flammâ libidinis et paternum maculaverit thorum, sed quod in initiis laudis ei aliquid videtur adscribere dicens: tu virtus mea; idcirco fit, ut gravius notetur in crimine, qui cum virtus patris haberetur et initium filiorum, nesciit servare reverentiam patri. Quale est et illud, quod dicitur per prophetam: Ego te plantavi vineam fructiferam etc.

Num. 2. Rufinus.

Secundum mysticam vero intelligentiam videtur mihi Ruben prioris populi Judæorum ferre posse personam, qui et primogenitus est et initium filiorum sicut et propheta dicit: Israel primogenitus meus. Primis namque illis data sunt eloquia Dei. Quod autem durus fuerit ille populus et temerarius, Scripturæ denunciant, dicit enim de eis propheta: omne, quod loquitur populus hic, durum est. etc.

Origenes: Secundum vero intelligentiam, videtur mihi Ruben prioris populi Judæorum ferre posse personam, qui et primogenitus est, et initium filiorum, sicut propheta dicit: Israel primogenitus meus. Primo namque illis data sunt eloquia Dei. Quod autem durus fuerit ille populus et temerarius, scripturæ denunciant; dicit enim de eis propheta: omne, quod loquitur populus hic, durum est. Reliqua quæ sequuntur ad finem usque hujus Benedictionis iisdem omnino verbis apud utrumque expressa sunt, sensusque moralis eodem modo in fine applicatus.

Benedictio Symeon et Levi, ne verbo quidem inter se differunt; et Benedictio Judæ eadem apud utrumque omnino est, usque ad finem homiliæ Origenis; tum enim ab his inde verbis: *filios patris sui, quasi in morali loco* etc. Rufinus ad sensum loci moralem uberius enucleandum, de suo nonnulla addidit. Hinc apparet, Rufinum in his libris conficiendis Origenis interpretandi rationem allegoricam non modo suam fecisse, verum etiam homiliam ejus sæpius nominatam, ab ipso in sermonem latinum translatam, in commentarium suum verbotenus recepisse.

#### § 41.

Venimus nunc ad scripta Rufini historica breviter commemoranda, quorum præcipua habenda est historia ecclesiastica, decem libris constans ab Evsebii Cæsareensi græcè scripta, quam Cromatii monitu, duobus auctam, circa annum 400 in sermonem latinum transtulit. Evsebii historia inde ab ascensione Domini ad Constantinum, sive Arianæ litis ortum, res gestas narrando persequitur, ita ut septem priores libri, quæ ante Evsebii, tres posteriores ea, quæ temporibus ipsius acciderint, contineant<sup>166</sup>); unde Rufini duo libri ad mortem usque Theodosii Magni, sive annum 395 pertingunt. Si ad ea, quæ variis temporibus, tum de hac Rufini Evsebianæ historiæ versione, tum de duobus istis, quos addidit, libris, à doctis lata sunt iudicia, respicimus, tam diversa sunt sibi quæque invicem contraria, ut dum alii hoc opus summis laudibus efferant, alii id

---

<sup>166</sup>) Evb. Hist. L. 7. c. 32.

summo vituperio dignum esse censeant<sup>167</sup>). Quod Evse-  
bii historiam attinet, fatendum utique est, Rufinum in  
eâ vertendâ, ut in Origenis aliorumque scriptis interpre-  
tandis, nimîa libertate usum esse adeoque arbitrariè ver-  
satum, ut additis aliis, aliisque decurtatis, plurima muta-  
verit; dimidium enim libri octavi, qvî in exponendis cau-  
sis persecutionis Diocletianæ et martyrum certaminibus  
enarrandis versatur, omnino omisit<sup>168</sup>), decimum vix atti-  
git<sup>169</sup>), adeoque ex decem Evsebii libris fecit novem, qvam  
suam agendi rationem eo ipse excusatam haberi voluit, qvôd  
e decimo libro non nisi ea, qvæ superflua viderentur,  
omiserit, et historiæ si qvîd haberet, nono conjunxerit<sup>170</sup>);  
ordinem quoque capitum in libro sexto<sup>171</sup>) et septimo muta-

167) Antiquorum recentiorumque de hoc opere judicia conge-  
sta vide in Vallarsio à pag. 179 ad pag. 185.

168) Etsi argumentum libri octavi decurtaverit, capitum ta-  
men numerum auxit, ita ut hic liber apud eum 19 capita  
apud Evsebiûm vero 17 cap. contineat: caput enim 10  
in duo capita distribuit, et cap. 12 adiecit.

169) cfr. Præfat. in H. E. ad Cromat: ubi Rufinus, ideo se  
e decimo Evsebii libro multa omisisse declarat, qvôd  
perparum haberet in rebus gestis, per reliqua omnia in  
episcoporum panegyricis tractatibus, nihil ad scientiam  
rerum conferentibus, occupatus.

170) l. c.

171) Librum 6tum, qvî apud Evsebiûm 46 capitibus constat,  
ita contraxit, ut in versione ipsius modo 37 capita com-  
prehendat; capita quippe 14. 19. 20. 24. 25. 27. 32. 36.  
46. partim leviter attigit, partim ordinem eorum per-  
vertit.

vit <sup>172)</sup> in libri sexti capite undecimo revelationes Alexandro Hierosolymitano communicatas, ab Evsebio vix tactas, fusius libri ejusdem capite octavo expositas multiplicavit; in libro septimo adsuit narrationem de miraculis Sancti Georgii, quæ in Evsebio non reperitur. Hæc vero non nisi pauca e multis delibata sunt; si enim versionem hancce Rufini, per singulas ferè paginas à verbis Evsebio plus minus discedentem, seqvi vellem, vereor, ne talis inter utrumque instituenda comparatio fines hujus dissertationis longe excederet, et ad rem ipsam in confesso probandam parum conferre videretur. In hoc autem plerisque consentire puto, Rufinum, græcarum litterarum peritissimum, lepidi dicendi genere usum esse, nec non suis locis sensum Evsebio et verba aptissimè expressisse, unde minus æquum illorum de hac ejus versione judicium esse videtur, qui eam ne paraphrasin quidem dici posse arbitrantur, sed proprium opus, in quo tamen Evsebius plurimum exscripserit <sup>173)</sup>; et Rufinus ideo certe laude dignus est, quod primævos historiæ ecclesiasticæ fontes occidenti parum notos reseravit, et ita quoque ad vitam christianam enucleandam ac fovendam et ad conscientiam ecclesiæ explicandam nutrimenta suppeditavit. — Versioni tamen historiæ Evsebianæ, ἀκριβείαν, quam chronico Evse-

---

<sup>172)</sup> Libri 7ti capita 8 et 9. in unum contraxit, cap. 18. 29. 30. omisit, ita ut hic liber e 32 capitibus apud Evsebius constans, secundum versionem Rufini 28 cap. contineat. Præterea libro 1º duo capita addidit. Libri 3tii capita 38 et 39 in unum contraxit. Lib. 4. caput 17um omisit.

<sup>173)</sup> cfr. Vossium De Historicis Latinis Lib. 2, cap. 11, p. 66. edit. Amstelod. 1699.



bii vertendo Hieronymus adhibuit, longe præferendam esse, nemo inficias ibit. Quando ad duos reliquos à Rufino confectos historiæ ecclesiasticæ libros oculos convertimus, pretium illorum æstimaturis primum nobis ad fontes respiciendum est, e quibus narrationes suas hauserit; ex horum enim perspicuitate et criticâ, quâ adhibiti sunt, diligentia, unuscujusque historici fides ponderanda est; hic vero in Rufino summam et nequaquam excusandam negligentiam deprehendimus; fontes quippe, e quibus rerum gestarum narrationem deduxerit, in duas classes dispescit, quarum una majorum traditiones complectitur, altera ea, quæ ipsius memoria comprehenderat<sup>174</sup>), sed nec indicavit, quænam hæ majorum traditiones essent, quas alibi literas majorum appellat<sup>175</sup>), nec quænam aut quo jure fides iis habenda sit, nec fontes operis sui ita descripsit, ut inde discamus, quænam traditionibus, quænam ipsius memoriæ, iisve, quorum relata referat, adscribenda sint; et in hoc ab Eusebio valde discrepat, qui auctores narrationum suarum sæpissime nominat. Quum igitur Rufinus historiæ suæ fontes accuratius non indicaverit, de illorum auctoritate aliud ferri non potest judicium, quam quod ex ipsarum narrationum indole consideratâ sequitur.

Iam igitur, si hinc ad historiam Rufini revertimur, de eâdum ejus in fontibus eligendis, quâ in iis definiendis usus est, negligentia, persvasi reddimur; tot enim portentis atque prodigiis scatet narratio, ut incertos vulgi rumores haud raro sequutum, non immerito suspicari possi-

---

<sup>174</sup>) Præfat. in Hist. Euseb. ad Chromat.

<sup>175</sup>) Præfat. in Hist. Rufini eccl.

mus, ex. c. in libr. 1. cap. 5. Mirabilia Spiridionis episcopi narrantur. cap. 7. De Helenâ Constantini matre, crucem Domini perquirente, agit. cap. 8. De cruce Christi ab eâdem repertâ. cap. 14. De Athanasio puero alios baptizante. cap. 18. De Athanasio sexennium post concilium Tyri habitum in cisternâ latente, ut solem nunquam videret. cap. 35. De sepulcro martyris Babylæ. Lib. 2 cap. 8. De discipulis Antonii in eremo habitantibus, virtutes et signa facientibus. — Deinde, si de pragmaticâ rerum expositione quærimus, ita ut, nexu rerum gestarum servato, suo quæque ordine narrentur, videmus historiam à Rufino luxatam et sæpius inversam; ex. gr. non nisi pauca quædam Athanasii vitæ momenta retulit cfr. Lib. 1. cap. 14. quod tanto magis dolendum est, quanto plus hic vir, ætatis suæ celeberrimus, ad certam ecclesiæ christianæ formam provocandam contulit; de inverso temporis ordine cfr. Lib. 1. cap. 12. ubi concilium Constantinopoli habitum commemoravit, sed capite demum decimo sexto synodum Tyrianam; cum tamen hæc prius habita fuerit : anno 335, illud anno insequente : 336. — In temporibus quoque et annis, quibus quæcunque res evenerit, definiendis parum diligens fuit, ita ut filum narrationis facile perdamus, cum certis signis destituti temporum seriem sequi non valeamus. cfr. ex. c. L. 1. cap. 20. De synodo Mediolani congregatâ, quod anno 335 factum est. et cap. 21. De Ariminiensi concilio : anno 359, eodemque anno Orientalium Seleuciæ concilium est habitum.

Etsi vero hoc opus vitis suis utique laboret, magni tamen ab antiquis factum esse constat, ita ut vel ex ipsis Græcis Gelasius Cæsareæ in Palestinâ episcopus duos

Rufini libros in linguam græcam verteret. — Imprimis vero in occidente huic operi plures causæ ex ipsius pretio proximè non pendentes laudem pepererunt; primum enim, quando cum historiâ Eusebianâ in unum coaluerat, ad primævos — ut antea dictum est, — historiæ ecclesiasticæ fontes qualescunque, occidenti parum notos, aditum aperuit, qui tanto majoris momenti habebantur, quanto gravior externa et historica cum ecclesiæ conditore communio spectabatur, deinde quoque relationibus miraculosis martyrologia ecclesiæ latinæ adaucta sunt, tum etiam ad fidei catholicæ confessionem per septentrionem promulgandam plurimum contulit, cum definitiones concilii Nicæni in canones 22 abbreviatis in Lib. 1. cap. 6to auctor exposuisset<sup>176)</sup>, quæ inde petitæ in codicem ecclesiæ antiqvac Gallicanæ migrarunt; (cfr. Vallars. vit. Ruf. p. 179.) denique, quod animum erga Arium minus benignum spirare videbantur (cfr. Lib. 1. c. 13).

Cum vero historici sit, — qualem nobis fingimus — ut e claris ac limpidis fontibus rerum gestarum narrationes hauriat, ut à partium studio immunis sit, ut mutuum causarum et effectuum nexum facile cernat et quæcunque suo ordine exponat, denique — quod præsertim de historiâ ecclesiasticâ valet — ut in rebus narrandis, non ad externam tantummodo factorum speciem, verum etiam ad pium animi humani desiderium assiduo respiciat — hæ virtutes, historico necessariæ, in historiâ Rufini eccle-

---

<sup>176)</sup> Exstat alia, quæ nomen Rufini præ se fert, versio Symboli Nicæni, at magna est de auctore et interprete dubitatio cfr. Walch. Bibl. Symb. p. 83. Observ. 3.

siasticâ magnoperè desiderantur. — Attamen suum quæcunque ætas habet modulum, quo fructus ejus metiri debemus, nec erga Rufinum justî et æquî videremur, si e regulis historico servandis exeuntes ad libros ejus æstimandos accederemus, nullo temporis, quo vixit, respectu habito, ex iis pretium horum unicè ponderaturi. — Primum, quod historiæ Evsebianæ versionem attinet, monendum est, libertatem, quâ in explicando usus est Rufinus, ei soli non propriam, sed pluribus quoque patribus ecclesiasticis communem fuisse, siquidem Hieronymus eandem, licet majore apparatu critico instructam, in *Chronicon* Evsebii intulit, quod etiam ipse in *Præfatione* versionis testatur, in quâ monet se accuratè ex græco transtulisse ea, quæ à Nino atque Abrahamo usque ad Troiæ obsidionem Evsebius narraverat; ab excidio vero Troiæ ad vigesimum usque annum Constantini, multa e Svetonio ceterisque auctoribus latinis sc tum adjecisse tum mutasse; denique Evsebii *Chronicon* ab anno vigesimo Constantini, ubi desierat Evsebius, ad sextum usque Valentis consulatum, Valentiani vero secundum 3: annum 378, se produxisse.

Deinde si ad res miraculosas à Rufino in historiâ suâ ecclesiasticâ narratas, respicimus, eundem quoque prodigiorum amorem e pretio vitæ asceticæ trituto profectum, in aliis patribus ecclesiasticisque scriptoribus observare licet; de quibus, qui certior fieri voluerit, vitas Sanctorum, et Romanarum trium viduarum ab Hieronymo narratas consultum adeat<sup>177)</sup>; denique si Rufinum cum

---

<sup>177)</sup> Socrat. L. 1. c. 12 in fine, narrationem Rufini Hist. Eccl. Lib. 1. c. 5 De Spiridione ejusque miraculis re-

Socrate ac Sozomeno comparamus, quorum ille historiam ecclesiæ septem libris complexus est eamque à Constantino M. incipientem ad Theodosii minoris tempora perduxit; et hic historiæ ecclesiasticæ libros novem à consulatu Crispi et patris ejus Constantini incipientes ad imperium Theodosii minoris pertingentes condidit; majorem utique in his diligentiam demonstrant accuratæ ut plurimum temporum notationes ac conquisita undique optima historiæ ecclesiasticæ monumenta, episcoporum literæ, synodorum acta, scriptorum istius ævi ecclesiasticorum libri. Sed observandum quoque est, Rufino ad hos fontes nec tam facilem, quam illis, præsertimque Sozomeno, qui Imperatori Theodosio minori historiam suam dicavit, adiutum patuisse, et præter hanc, eum aliis, etiam majoribus utique difficultatibus ei pugnandum fuisse; tam arctè quippe causæ cum effectibus cohærere solent, effectusque varias causas, temporis demum certo quodam intervallo enucleandas in se continere, ut res gestas præsentis temporis et nexum inter eas mutuum narraturo plus laboris offeratur, quam ei, qui facta præteriti temporis in superiore loco quasi constitutus refert, singulaque temporis phaenomena cum causis suis et sequelis dignoscere et in omnes partes examinare potest; hoc Socrati et Sozomeno contigit, qui post Rufinum historias suas confecerunt, ideoque omnia melius disponere et in ordinem redigere valuerunt,

---

ferre non dubitavit, sequæ eam ex Rufino accepisse professus est, ο: συνταγματι Ρωφίνου τινος προϋσυντακτη, Ρωμαϊκή λέξι συγγράμμενον. Ruf. H. E. Lib. 2. c. 8. eadem portenta vide apud Sozomen. L. 6. c. 23—35.

præsertim cum opus Rufini ad manus haberent<sup>178</sup>), quod ea, in quibus errasset, evitandi et meliores fontes circumspiciendi occasionem illis præbuit. — Tandem si Rufinus à partium studio non omnino alienus fuerit, haud mirum est, cum tota illius ætas indolem polemicam præ se ferens in hæreticis impugnandis occupata teneretur, unde etiam Socratem Novatianis patrocinatum esse, scriptores antiquos narrasse constat<sup>179</sup>).

## § 42.

Historiam quoque cremiticam, sive vitas patrum (monachorum) uno libro comprehensas Rufinus confecisse dicitur. Sed de auctore haud parva dubia moveri possunt, quamvis ei à plerisque tribuatur. — Agit hic liber de itineribus per deserta Ægypti susceptis, quibus cum compluribus monachis ibi degentibus, sanctitate æque ac miracula faciendi potestate inclytis, auctor familiaritatem iniit, quorum portentorum immodicâ superstitione congestam molem lectoribus offerre non erubuit. Nec ideo tamen libellus Rufino abjudicandus esset, credulitatem enim et prodigiorum amorem cum ævo suo communem habuisse, abundè, quam scripsit, historia confirmat ecclesiastica. Quominus vero Rufinus libri istius auctor habeatur, maxime impedit, quod Hierosolymis, nec in Ægypto tempore, quo res narrantur, versabatur<sup>180</sup>). Præter ea,

178) Socrates priores duos historiæ suæ libros ex fide Rufini composuit, eum vero meliores nactus auctores reliquit.

179) cfr. Cave Hist. liter. edit Lond. 1688. p. 339.

180) Librum Rufino auctori Vallarsio vindicanti tot ac tantæ difficultates chronologicæ occurrerunt (p. 191—200), ut,

quæ jam commemorata sunt, Rufinus varia varii generis et ipse elaboravit<sup>181)</sup> et e græco in sermonem latinum transtulit<sup>182)</sup>, quibus, cum et alia deperdita sint et, quæ

discrimine inter scripti et rerum scriptarum auctorem facto, Rufinum, non de suis per Ægyptum itineribus, sed alius cuiusdam loquentum esse statuerit. Hoc autem verbis ipsius auctoris omnino repugnat, cum in initio libri se testem ocularem eorum, quæ narret, fuisse sapius affirmet cfr. p. 117—120, et ne uno quidem verbo diversitas utriusque commemoretur. Hæc vero in Rufinum quadrare non posse inde apparet, quod post annum 385 in Ægypto nunquam fuit, sed auctor sub finem anni 394 ibi versatus est. vid. Vallars. vit. Ruf. p. 194. — Notata quoque dignum est, quod Gennad. cap. 17. p. 92 scripta Rufini enumerans, hunc de vitâ monachorum librum silentio præterit.

181) Varias Rufinus ad timorem Dei hortantes epistolas scripsit, quarum quæ ad Anicianam Falconiam Probam missa est, jam vero deperdita, ceteris præstitisse fertor.

182) Præter ea, quæ supra passim commemorata sunt, multa e græco in linguam latinam vertit, quarum præcipua hæc sunt: Basilii magni regula, ejusdem homiliæ octo. Gregorii Nazianzeni opuscula decem, æ: apologetici liber unus, De Epiphaniis, De Luminibus, De fide Lib. 1, De Nicæna fide (cfr. not. 176) Pentecoste et Spiritus S., De Semet ipso ex nigro reverso, De dictis Jeremiæ (vide supra § 38 n. 157), De reconciliatione et naitate monachorum, De grandinis vastatione, De Arianis. — Clementis Romani Recognitiones. Anatolii Alexandrini Canon pascalis. Utrum vero Origenis homilias De Mariâ Magdaleaâ et De epiphaniâ Domini, latine verterit, du

supersunt, ad fidem studiave Rufini uberius illustranda nil conferant, diutius immorari, operæ pretium non esse videtur.

---

binum est. versio Iosephi operum non cum, sed Ambrosium auctorem habet, nec majore jure vita S. Eugenii illi adscripta fuit.

---

#### Errata.

Pag.	3.	lin.	9.	leget nisi
—	—	22.	—	vicesimus
—	13.	—	6.	περι Μορῶν
—	—	14.	—	Quod
—	—	18.	—	malique
—	17.	—	23.	λεχθῆσθαι
—	29.	—	22.	qvæ
—	30.	—	15.	christianorum
—	31.	—	20.	christianæ
—	41.	—	23.	invisibilem
—	61.	—	17.	putavit
—	98.	—	23.	tributo

---













